

# Jesucriston Juan Oinmani Cuscan

## (Apocalipsis)

**Ahuara ahuuscaran ashquiai cuscan  
Jesucriston Juan tapimani**

**1** <sup>1</sup>Uhuun yoramishtichin natian un mato cunu fomai man tapinon.  
Unquian Juan un mato cunu fomai. Upa Diosin Jesucristo yonoa samamaasha ahuara ahuuscaran huariscashquiai cuscan ahuun yorafo tapimashquin. Ascacun iquisi ua oinmayoa. Jesús ahuun oinmati nan nai muran ica uqui nichian. Upa Diosin ahuun yorafo tapimapaiyai cuscan ua tapimayoa. Ascacun nan ua tapimana cuscan un mato yoi. <sup>2</sup>Upa Diosin Furun Jesucristohuunoa yoia cuscan nan iconcoin. Ascashon nan ua yoia cuscan ua oinmana cuscan huafain nantifi un cunua. <sup>3</sup>Ascafia un cunua cuscan icataima. Inon pacuai cuscan iquisi un mato cunushona. Un cunua cuscan futsafo yoi arifi unimaino nan nicaifori icoineha huafain nanfori unimashcani. Un mato cunushonai cuscan samamashta iiishquin.

**Juanpan Diospan yorafo siete mai futsafo  
aria ichananmisi ato cunu fomani**

<sup>4-5</sup>Ascan Asia mai ano man icati pushurasi siete nan Jesús icoineha huafio ichananmisifo un mato cunu fomai cuscan nicasharacahuun. Nocon Upa

Diosin niyopaonishaquin natianrifi nicain nipanaca. Ahuun Yoshin Sharari afu ipamisi. Nan Upa Diosin yafi ahuun Yoshin Sharapan non Furun Jesucriston matohuun ramapaiyaino maton nomuran mato shinansharamapainonfo. Ahuaton maton nomuran fucash huanonma. Nocon Ifo Jesucriston Diospan tsain noco yoimisi cuscan non icoineha huatiro. Nan Diospan Facucoinfiacun rutunifo. Rutushon mai huafiafo Apa Diosin funimani afu ipashquin. Tsoa futsacai ascayomisima. Ascan Apafu ishon nantifi niaifofo maifoti anoaflo ato iquishquin. Nanton noco noicoin. Ascashu ahuun imi focain noco nashoni ahuara chaca afanan nocon ifo inonma.

<sup>6</sup>Ascacun ahuara chaca nocon ifo itamarocon ahuunoashu Apa Diosin ahuun yorafo man non ica. Ascashon noco yonomapaiyai cuscan non anon. Ascan non ahuun yorashon futsafori non Upa Dios cufishotiro. Nanscaraflo nocon Ifo Jesucriston man noco ima. Ascacun nantifi yorafoan ahunshon isca huaquin yoipacupainonfo, —¡Aicho! Tsoa futsacai Jesús cuscara sharama. Arus fusti nocon Ifo ipanaca. Arus fustiri nantifi yorafo ato iquipacunaca, —ishon yoipacupainonfo. ¡Amen!

<sup>7</sup> “Shinancapon. Nocon Ifo Jesús  
cooin camaqui afanan oaiton  
nantifi yorafo niafo futan  
namisifoanri oinshquicani.  
Nan mastamisifoanri oinshquin.  
Ascashu noocoaiton nantifi  
manifotifain ratucaquin  
yoishcani isca huaquin,  
‘¡Ohushta! Diospan Furun Jesús  
non chaca huamisishaquin non  
aquí ratucoinran,’ ishon  
yoishquicani.  
Nanscafín aashquiquin. ¡Amen!”

<sup>8</sup> Jesús yoiquin isca huani, —Unfin  
ahuara oniataima iyopaoniquin. Urifi un  
ipamisi. Ahuutiamain nocon mai  
cuyoicai urus fusti un ato yoitiro. Unfin  
ahuamamishti huatiroquin. Un  
niyopaoni cuscan un ipanacaran,  
—ishon nocon Ifoan yoini.

#### Nocon Ifo Jesucristo aficoín Juan oinmani

<sup>9</sup> Unquian Juan un matofu Jesús  
ahuun yora. Ascacun man uhuun yorafo.  
Nantifi non icoínra huafó noco  
iquinashu no fu rafupacunaca. Man  
Jesushuunoashu omitsiscafiaquin man  
tunumisi. Man mumisi cuscan urifi un  
mumisiquin. Un Diosin tsain yoifain  
Jesushuunoari ato yoimisi. Ascacun  
aton niaifoan ranushumuafó yonoa ua  
achicashon ua mai futsan ahuun anu  
Patmos ano ua nichinifo. Nan mai unu  
toomanhuan ano. <sup>10</sup>Nanno domingo  
futsaino Diosin Yoshin Sharapan ua  
iquifain nan tapimapaiyai cuscan ua  
tapimashquin. Ascashon ahuara  
namapan cuscarahuunshon man ua  
ismacoian. Ascaiton ucachiorinoa tsain  
achacoin un nicariscatana. Nan manuti  
nicatsa un nica.

<sup>11</sup> Ascashon ua isca huaquin yoia,  
—Min oiaín cuscacoin futsafo  
cunushohuun. Nan cunu Jesús icoínra  
huafó ichananmisifoti ato fomahuu. Nan

ichananmisifo Efeso anoafó fomafain  
Esmirna anoafó fomafain Pérgamo  
anoafó fomafain Tiatira anoafó fomafain  
Sardis anoafó fomafain Filadelfia anoafó  
fomafain Laodicea anoafori min oiaín  
cuscacoin cunushon ato fomahuu,  
—ishon ua yoia.

<sup>12</sup> Tsoamain ufu tsainquicai nicatan  
ifiacucuhua oinpaiquin un oian  
lamarina cuscara otati siete oro ointsa  
un oian. <sup>13</sup>Nan otafo nushmancayan  
nocofunu ointsa nanno nia. Ahuun  
sahuuti ofan ofaicai sahuufain ahuun  
nanushumuti putacoin ahuun shochi  
ano nuua oshin oro ointsa faca facaitsa  
sahuua. <sup>14</sup>Ahuun foo oshopacoin yoa  
rama furoa ointsa. Ahuun furorifi chi  
shahuacai ointsa. Ascan faquishfiano chi  
uruaino non oinsharatiro. Nanscarifiai  
yorafoan fomanpaiquin ahuara  
onupaifaiton Jesús onantiro. <sup>15</sup>Ahuun  
taurifi cuno faca facaitsan ointsa. Ahuun  
oi uhuapacoin shushan tuporo iqui  
nicatsa. <sup>16</sup>Ahuun mucusumihuuri fishi  
ointsa siete tsoma. Ahuun ashfan  
muranri nopusocuma rafu cunocoin  
asuonmua ointsa. Ahuun fusorifi fari  
chashaquin finai ointsa. Nanscara nan  
nocofunu un oian.

<sup>17</sup> Nan ointani un ananman pacua nan  
naa shinantsai. Ascaiton ahuun mucusumihuuri  
fishi manmainyanan ua  
yoiquin isca huaa, —Ratuyamahuu.  
Ahuara oniataima un iyopaoni.  
Nanscarifiai un ipanaca. Uncai  
unupacunacama. <sup>18</sup>Unfi ipamisiquin.  
Mun naflanishaquin un afanan funini.  
Ascashu un nipanaca. Yorafo naitian  
urus fusti un ato numatiro. Un shafi  
cuscara aya. Un fupotiro  
omitsiscapanacafó muran fotamarocon  
Upa Dios icari fononfo. Ascafia  
ascayamaifoan un fuputiro  
omitsiscapanacafó muran fononfo.  
Unfin nipanacaquin.

<sup>19</sup>Ascacufin rama min oiain cuscan huafain chiporifi un mia oinmashquiain cuscan cunuhuu. <sup>20</sup>Ascashon natian min oian cuscan un mia yoi min tapinon. Nan fishi siete non nan lamparina siete oro ointsa nanfihuunoa un mia tapimanon. Nan fishifo un tsoma nanfofin nan ichananfo Diosin tsain ato tapimamisi cusracafoquin. Ascan nan lamparinafo oro ointsafo nanfofin ichananti pushu ano Jesús icoingra huafu cusracafoquin, —ishon Jesús ua yoia. Nan siete ichananti pushu anoa icoingra huafu ato tsain shara fomani.

**Jesús Efeso anoa icoingra huafu ichananti pushu murannoao ato yoini cuscan**

**2** <sup>1</sup>Ascatan Jesús ua yoiqui isca huaquin,  
—Ua icoingra huafu Efeso anoa aton Diosin tsain yoimisi un yoipaiyai cuscan ua cunushoquin isca huai. “Unquian maton Ifo Jesús un nantifi Uhuun Upa Diosin tsain yoimisifo un atofu icacaimisi ato cushusharashquin. Ascacun un mato yoipaiyai cuscan ua nicasharacahuun. <sup>2</sup>Man imisi cuscan mun tapia. Man manfin uhuunoashu fasi yonosharamisiquin. Ahuara ahuuscarafiaino man tunucoinmisi. Yora chaca huamisifo fu man rafucasmamisi. Ascan ratoran futsan yoimisi isca huaquin, ‘Cristo ua nichian. Ascacun un mato yosinon,’ ishon mato yoiaifoan. Man yoimisi isca huaquin, ‘Non tapinon. Aton tsain non nicayonon iconmainquin,’ man huamisi. Ascashon ato nicacaquin man ato onanmisi uhuun tsain mato yositama aafin chaniaifoan.

<sup>3</sup>“Ascan uhuunoashu omitsasciaquin man tunucoinmisi. Mancaí ua tanaquin unupaimisima. <sup>4</sup>Man asca sharafiamisi un tsain futsan mato yoisharapai. Man fasi ua noiquin tauhuani cuscacai natian man ua noiquin asca huaima. Man mutoi futsui.

<sup>5</sup>“Man ua noiquin tau huani cuscan shinancahuun. Nanscacoин huaquin ua noicahuun. Man noinain tauni cuscan afanan noinancoincahuun. Chii tsoan tanama samamashta nocatiro. Nanscarifiai marifi man chi nocacuana cuscara. Ascashon man ua tanasharayamaiton oinquin tsoan afanan mato tanaima. Ascashu man ichanainno afanan tsoa matofu ichanainma. Man chaca huai cuscan shatupaiyamafain uquiri man nasopaiyamaino un matoqui oshon un mato shatumatiro. Man afanan uhuun tsainyoimisi inonma. Man ascaitocai tsoan afanan matohuunshon ua tanapaishquima. <sup>6</sup>Asca huafiaquin ahuara futsan man shara huamisi. Nan Nicolaítafoan amaqiru yosiaifoan atirifiton mato muranshon tanafo nanfoan chaca huamisi cuscan un noicasma. Un nan chaca noicasma cuscan marifi man noicasmai.

<sup>7</sup>“Ascacun man pafiquiyaquin Diosin Yoshin Sharapan nan icoingra huafu ato yoiai cuscan nicasharacahuun. Ascan Satanás mato chaca huamapaimisi. Ascafia tsoan uhuun curushhuunshon Satanás yafi ahuara chacafori finoncoian naantofin ua cachiquiri huatamarocon ua tanasharacoianquin. Naanfin Upa Dios icano un iquimashquiquin ufu ipasharanon,” —ishon Jesús nan icoingra huafu Efeso anoafo yoia.

**Jesús Esmirna anoa icoingra huafu ichananti pushu murannoao ato yoini cuscan**

<sup>8</sup>Ascatan afanan Jesús ua yoiqui isca huaa,  
—Ua icoingra huafu Esmirna anoa aton Diosin tsain yoimisi un yoipaiyai cuscan ua cunushoquin isca huai. “Unquian, un maton Ifo Jesús, un mato yoisharapai

man tapinon. Ahuara oniataima un iyopaoni. Urifi ipanaca. Uncai unupacunacama. Mun nafiacun Upa Diosin ua funimani. Ascashucai un afanan napanacama. Unocon nipanaca. Ascacun un mato yoiqui isca huai.

<sup>9</sup>“Man omitsiscai cuscan mun tapia. Mun tapiari man ahuuoma. Man ahuuomafia un matofu icano man ua cuscara shara itiro. Ascacun un maton nomuran fpuashotiro man unimanon. Uricai mato potapacunacama. Ascano uhuun Upa Diosin ica ari nantifi un aya cuscan nanfori matona iishquin. Ascacufin man ahuuomafo ointsaphia manfin ichapayaquin. Ascafia mun tapia futsafo Judio cainfianishaquin ua icoindra huafoma. Ascacufin nanfocai Diospan yorafoma. Ascashon matohuunoa tsain chaca yoimisifo. ‘Norifi non Diosin tanamisiran,’ ishon yoifiafocai iconma. Ascashu nanfoan Satanás tanacanashu ahuun yoracoinfo ica.

<sup>10</sup>“Ascano inon pacoui cuscan un mato yoionon. Satanás atirifi mato cunu muran iquimashquin manmain ua cachiquiri huamainquin tapipai. Ascacun ahuutiaran man omitsiscashquiain cuscan ratuyamacahuun. Ua cachiquiri huatamarocon isca huaquin shinancahuun, ‘Ua rutufiafoannocai un ratuima. Ua chaca huafiainfoanri un tunucontiro. Uncai uhuun Ifo potapacunacama. Ascacun uhuun Ifo un tanaqui finacoinfafaini,’ ascashu man naiton un mato nimapacunaca man ufu ipanon.

<sup>11</sup>“Ascacun man pafiquiyaquin Diosin Yoshin Sharapan nan icoindra huaflo ato yoiai cuscan nicasharacahuun. Ascan tsoan omitsiscasiaquin ua cachiquiri huayamai nantofin Satanás uhuunshon finoncoianquin. Ascatan naashucay

omitsiscapanacafo muran canacamaran,” —ishon Jesús nan icoindra huaflo Esmirna anoaflo yoia.

**Jesús Pérgamo anoa nan icoindra huaflo ichananti pushu murannoaflo ato yoini cuscan**

<sup>12</sup>Ascatan afanan Jesús ua yoiqui isca huua,

—Ua icoindra huaflo Pérgamo anoa aton Diosin tsain yoimisi un yoipaiyai cuscan ua cunushoquin isca huai, “Unquian un maton Ifo Jesús, un mato yoisharapai man tapinon. Uhuun tsain nan nopus ocuma rafu cunocoin cuscara. Ascashon uhuun tsainmansu uhuun yoraflo cushusharafain nan ua noicasmamisifo un ato onaintimatiro.

<sup>13</sup>Mun tapia man pushurasi Pérgamo ano ica. Nannoshori Satanás yoraflo iquimisi. Ascafiafino rafitama man ua tanasharamisi. ‘Jesús uhuun Iforan,’ man ato huamisi. Nannori ua tanamisi futsan ahuun anu Antipas nanton uhuunoa ato yoifafainmisi. Ascacun nan man rutuaflo. Nanscara man tapifiashhocai man ua potama. Manricai ratuima. Ascashon maton nomuran man shinankuin isca huua, ‘Noco rutufiafoannocai nocon Ifo Jesús non icoindra huauquin shatuimaran,’ ishon man shinamisi.

<sup>14-15</sup>“Nanscara shara. Ascafia ahuara fustirasi man chaca huamisi cuscan un mato yoi man afananasca huanonma. Shinancapon. Ahuuscashomain Israelifo non chaca huamatiroquin ishon niaiflo Balac nan nocofunu Balaam yocani. Ascaiton Balaam nan yosini. Ascacun nan Balac Israelifo chaca huamani aton ahuinma chotamafain ainfofori aton funumafoya ato imani. Ascashon nan ua icoindra huamafoan ahuara futsafo ramí huacashon nocon Diosiran ishon tushu inanmisifo. Nan tushu Israelifo atofu

ichanancashon nan piinifo.  
Nanscarifiaquin matofu ichananmisi  
atirifi nan Balaam chaca yosini cuscan  
nanfoanri natian nansca huacani.

<sup>16</sup>“Ascacun nan Balaam ato chaca  
huamani cuscan marifi afanan  
ascayamacahuun. Ascan ratoranfoan  
chaca shatuyamacayaino un atoqui  
samamashta noriscashquin. Ascashon  
uhuun tsainmans un ato  
onaintimashqui. Uhuun tsain nan nopus  
cunocoin cuscara.

<sup>17</sup>“Ascacun man pafiquiyaquin Diosin  
Yoshin Sharapan nan icoira huafu ato  
yoiai cuscan nicasharacahuun. Ascafia  
Satanás mato chaca huamapai. Tsoan ua  
cachiquiri huatama uhuunshon Satanás  
finoncoian nantonfin ua  
tanasharacoianquin. Ascacun un  
cushusharashquin. Un Israelifoan aton  
shunifo fariña cuscara fata shara nai  
muranshon shafatifi un ato  
niriashopaoi. Nan anuquin manánran  
huapaonifo. Ascan tsoancai tapipaonima  
ahuuscashomain un ato niriashoicain.  
Nanscarifi aqui un nan manán futsa  
cuscara un ato inanshquin nancai tsoan  
ointiroma. Nanfihuunshon un ato shara  
huapanaca. Ascatari tsoan chaca  
huatama ua tanafafainaiton un ato  
toquiri osho sharashtacoin inanshquin.  
Tsoa futsacai nan anu onantiroma.  
Ascan nan toquiri fiafin ufu  
ipasharatiroquin,” —ishon Jesús nan  
icoira huafu Pérgamo anoafu yoia.

**Jesús Tiatira anoa nan icoira  
huafu ichananti pushu  
murannoafu ato yoini cuscan**

<sup>18</sup>Ascatan afanan Jesús ua yoiquiri isca  
huua,

—UA icoira huafu Tiatira anoa aton  
Diosin tsain yoimisi un yoipaiyai cuscan  
ua cunushoquin isca huai. “Unquian, un  
maton Ifo Jesús, un mato yoisharapai

man tapinon. Uhuun furo chii shahuacai  
cuscara. Ascacun un mato onancoian.  
Uhuun tau nan cuno faca facaitsan  
cuscara. Ascacun un mato yoiquiri isca  
huai. <sup>19</sup>Mun tapifain mun onancoian  
man shara huamisi cuscan. Ascashu  
man noinancoian. Ua icoira huafain  
man ua tanacoinmisi. Uhuunshori  
futsafo man shara huamisi. Ascatan  
omitsiscafiaquiri uhuunshon man  
tunucoinmisi. Ascacufin man ua icoira  
huaquin tau huanitian man futsafo  
shara huamisi. Ascafia natiancaifin  
mima huauquin man ato shara  
huafafainiquin.

<sup>20</sup>“Ascashon man ato shara huamisi.  
Ascafia ahuara futsan man chaca  
huamisi cuscan un mato yoi man afanan  
asca huanonma. Nan ainfon Jezabel  
ipaoni cuscara matofu ichananmisiton  
yoimisi isca huaquin, ‘Unfi Diosin tsain  
mato yoitiroquin,’ ishon mato yoifiamisi  
nantocai uhuun tsaincoin yoimisisima.  
Aafin chanimisi. Ascashu nan ainfo fasi  
chacacoin. Mato amaquiri yosimisi.  
Ascafiaitocai ahuun tsain man  
shatumamisima. Ascashon ua  
yonoshomisifo paramisi aton ahuinma  
chotanonfo. Nanscarifi huaquin ainfofo  
aton funuma chotamamisi. Ascashon  
mato yoimisi isca huaquin, ‘Ahuara  
futsa non rami huanon nocon dios inon.  
Nan non tushu inanon. Ascano marifi  
man atofu ichananshon nan tushu man  
pitiroran,’ ishon nan ainfoan mato  
chaca yoimisi.

<sup>21</sup>“Ascafia nan ainfoan chaca huamisi  
cuscan un yoifafainmisi uamain icoira  
huashon ahuun chaca shatuicai.

Ascafiaitocai ahuun chaca shatupaimisima.

<sup>22</sup>Ascacufin un isininmaquin finacoinquin  
racashu omitsiscanon. Ascano ratoran  
futsafo a cuscara furomacoinshon aton  
chaca shatuyamaifoan nanforifi un ato  
onaintimaquin finacoin omitsiscanonfo.

<sup>23</sup>“Ascano ahuun tanamisifori un namaquin cuyoshquin. Un asca huaiton nantifi ua icoindra huafo maifoti anoafaoan tapitirofo un nantifi yorafo onancoian. Ascashon aton nomuran shinainfo cuscan un onancoian. Tsoancai ahuashta ua fomantiroma. Ufimain un nantifi onancoincun. Ascacufin nan shara huamisi urifi un ato shara huashquin. Ascan ratoran futsan chaca huamisi nanrifi un onaintimashqui.

<sup>24</sup>“Uhuun yoramishti Tiatira anoafaoan mancái atirifiton nan ainfoan mato chaca yosipaiyai cuscan man tanamisima. Ascan nan ainfoan ahuun nomuran Satanás shinanchacamanai cuscan ahuun tanamisifo fustisi ato tapimamisi. Ascafia mancái anori tapipaimisima. Ascacun un mato yoisharapai. Ahuara futsacai un mato yonoima. <sup>25</sup>Ascacun uhuunshon man tapimisi cuscan nanfohuun ointiaquimayamacahuun. Un mato ihuiyoaitian nanfo cachiquiri huapaiyamacahuun.

<sup>26</sup>“Tsoan Satanás finoncoinfain nan ainfoan chaca yosiai cuscan tanatama nan naitian uhuun tsain tanasharacoianshu unfu ipashquin. Ascan naanfin niaifo patashari itiroquin. Nan maifoti anoafao ato iquishquin <sup>27</sup>Ascano Upa Diosin tsain uhuunoa cununi isca huaquin, ‘Cristo maifoti anoafao ato iquina. Ascan tsoan ahuun tsain shara nicacasmaiton ato onaintimashquin. Mai cuti curushcain non potaino moshi futsutiro. Noncái afanan ahuuscashon shara huatiroma. Nanscarifi aquin nan yoitimamisifo ato onaintimanitanci tsoashta ato numatiroma naanonfoma,’ ishon uhuunoa cununi. Upa Diosin ua yononi cuscan nanscarifi huaquin un mato yonoi maifoti anoafaoan aton niaifo man

inon. Ascashon man ato yoiai cuscacoin anonfo. <sup>28</sup>Shafaino ishtumanhuan fustiton chashaiton nantifain ointirofo. Nanscarifiai un afanan oaiton nantifain ua oinshcami. Ascano nantianrifi un ato yonoshquin ainfoan tsoashta chaca huatama uacairocon tanasharanonfo. Ascashu ufu isharapacunacafo. <sup>29</sup>Ascacun man pafiquiyaquin Diosin Yoshin Sharapan nan icoindra huafo ato yoiai cuscan nicasharacahuun,” —ishon Jesús nan icoindra huafo Tiatira anoafao yoia.

**Jesús Sardis anoa icoindra huafo ichananti pushu murannoafao ato yoini cuscan**

**3** <sup>1</sup>Ascatan afanan Jesús ua yoiqui isca huua,

—Ua icoindra huafo Sardis anoa aton Diosin tsain yoimisi un yoipaiyai cuscan ua cunushoquin isca huai. “Unquian, un maton Ifo Jesús, un mato yoisharapai man tapinon. Diosin Yoshin Shara ufu rafumisi. Ascacun nan Diosin tsain yoimisifo un iquimisi. Ascacun un mato yoi isca huaquin. Man amisi cuscan mun tapicoian. Yorafoan matohuunoa yoimisifo isca huaquin, ‘Nan Sardis anoafaoan Jesús icoindra huafain isharacoinmisforan,’ ishon matohuunoa yoimisifo. Man isharamisifo ointsacun. Ascafia mancái matohuunoa yoiaifo cuscan man amisisima. Mancái ua tanacoianma.

<sup>2</sup>“Ascashu man uqui ointi mutoa. Afanan ascayamacahuun. Man shinanyopaoni cuscan nannori afanan shinancahuun. Ascafia mun tapia Upa Diosin mato imapaipayai cuscan man ascacoiantaima. Ascashon un mato yonoi cuscan afiaquin atirifi man ascacoianma. Ascacun maton nomuran afanan shinansharacahuun man uhuunoa tapimisi cuscan nantifi funononma.

<sup>3</sup>“Ascacufin man uhuun tsain icoínra huafain man nicapaoni cuscan afan nannori shinancahuun. Man chaca huaa cuscan afan asca huatama uarocon tanasharacahuun. Ascan afan man uqui nasoyamacaiyaino un matoqui samamashta nocoriscatiro mato onaintimashqui. Pushu muran icafoan tapitirofoma ahuitianmain yomutso aton pushu muran iquiriscatiroquin. Nanscarifiai mancái tapiama ahuitiaran un matoqui nocoriscatashquin mato onaintimashqui.

<sup>4</sup>“Ascafía matofu ichananmisifo fustirasi Sardis anoafaoan chaca huamisifoma. Nocon sahuuti choshtacoincun non pucatiro futsa funa shara sahuushquin. Nanscarifiai atirifí man chaca shinanpaoni cuscan man potacoínshon uhuunoa fusti man shinanfafainaíno un matoqui noocoaitian sahuuti oshopa sharashtacoin un mato inanshquin man ufu ipanon. Ascan isharamisishaquin man unfu ipanaca ua cuscara shara iishcaquin.

<sup>5</sup>“Ratoran futsafori maton cuscara uhuun tsain cachiquiri huatama ua tanasharafain uhuunshon Satanás finoncoincun nanfotín unfu isharapacunacafo. Ascashu ua cuscara shara iishcani. Nanforifi un ato sahuuti oshopa sharashtacoin inanshquin ufu ipanonfo. Ascan Uhuun Upa Diosin nan ua icoínra huafoti aton anufo man libro muran cunua nantifain tapinonfo ufu ipashquiaifo. Ascan nanfo fusti afu nipatirofo. Asacashocai un aton anu soapacunacama. Uhuun Upa Diosin futan ahuun oinmati afu nai muran icafoan ointaifi un ato yoishquin isca huauquin, ‘Nafofin uhuun yoracinfoquin,’ ishon un ato yoishquin. <sup>6</sup>Ascacun man pafiquiyaquin Diosin Yoshin Sharapan nan icoínra huafot ato yoiái cuscan nicasharacahuun,” —ishon

Jesús nan icoínra huafot Sardis anoafyo.

**Jesús Filadelfia anoa nan icoínra huafot ichananti pushu murannoafot ato yoini cuscan**

<sup>7</sup>Ascatan afan Jesús ua yoiquí isca huaa,

—Ua icoínra huafot Filadelfia anoa aton Diosin tsain yoimisi un yopaiyai cuscan ua cunushoquin isca huai.

“Unquian un maton Ifo Jesús, un mato yoisharapai man tapinon. Unfin ishara fustimisiquin. Uhuun tsainrifi iconcoín. Pushu ifo shafiya arus fusti pushu fuputiro yorafo iquimai iyamarai fupotiro futsafo iquinonfoma.

Nanscarifiai maton niaifo David shafi cuscara ipaoni. Tsoa ahuun mai ano imapai iyamarai ato nitun huapaoni iquinonma. Nanscarifiai unfi David funauquin. Urus fusti un yoitiro upa Dios icano tsoa iquitiro iyamaraimain iquitrioma. Ascacun un mia yoi isca huaquin. <sup>8</sup>Man amisi cuscan mun tapicoian. Un mato yonaa cuscan man futsafo uhuunoa yoimisi. Ascacucaí un mato yonaa cuscan tsoan mato shatumatiroma. Man ascaiton futsafoan matohuunoa yoafo nafocai ahuamaran mato huafiaifoanno mancái uhuun tsain cachiquiri huamisima. Ua cachiquiri huatamarocon Jesús nocon Iforan man huamisi.

<sup>9</sup>“Futsafo arifi Judío Cainfianishaquicai ua icoínra huafoma. Ascan nanfocai Diospan yorama. Nanfo chanimisifo. Ascacun un ato yonoshquin mato fuoshopacufoan yoinonfo isca huauquin, ‘Icon. Diospan Furun matohuun noicoin,’ ishon matohuunoa yoishcani. <sup>10</sup>Ascano omitsiscifiai un mato yonaa cuscan funaquima man tunucoinmisi. Uhuun tsain nicafain ua tanasharashori man ua cachiquiri

huamisima. Ascacun chipo nantifi yorafo manifoti anoashu fasi omitsiscaifotian ratofomain Diospan ahuun yoracoinfoquin tapishcani. Ascashu nantifi icoindr a huamafo omitsiscaitian un mato cushusharashquin nanfo omitsiscuai cuscan man omitsiscanonma.

<sup>11</sup>“Ascacun un samamashta oshquin. Ascan man ua icoindr huaa cuscan potayamacahuun. Ascatamarocon Upa Dios tanasharacahuun mato inansharapaiyai cuscan futsan finonma. <sup>12</sup>Tsoan omitsiscafiaquin uhuun tsain cachiquiri huatama tunucoinfain ua tanasharacoinkhon nantonfin Satanás finoncoianquin. Ascashufin uhuun Upa Dios icano un ato imapacusharashquin. Nannoashu raqui canacafoma.

“Ascacun un nantifi tapimashquin nanfo Uhuun Upa Diosin ahuun yoraocun. Ascashon un ato yoiquin isca huashquin, ‘Nan nuno uhuun Upa icano man no fu ipanacaran,’ un ato huashquin. Diospan yorafo Jerusalén ano ipaonifo. Asca natianrifi Upa Diosin icano ahuun anu Jerusalén funa. Chipo nan Jerusalén funa Upa Diosin icariashu nocoqui fotoshquin. Ascan tsoan ua cachiquiri huamisima nanno ipanaca. Ascashon uhuun anu futsa tsoan nicayomisima nanrifi nan un ato anu tuqui huashoshquin. Ascashu un isharapacunaca cuscan arifi ufu isharapacunacafo.

<sup>13</sup>“Ascacun man pafiquiyaquin Diosin Yoshin Sharapan nan icoindr huaflo ato yoiai cuscan nicasharacahuun,” —ishon Jesús nan icoindr huaflo Filadelfia anoaflo yoia.

**Jesús Laodicea anoa nan icoindr  
huaflo ichananti pushu  
murannoaflo ato yoini cuscan**

<sup>14</sup>Ascatan afanan Jesús ua yoiqui isca huua,

—Ua icoindr huaflo Laodicea anoa aton Diosin tsain yoimisi un yoipaiyai cuscan ua cunushoquin isca huai.

“Unquian, un maton Ifo Jesús, un mato yoisharapai man tapinon. Upa Diosin ua amapaiyai cuscan fustisi huamishaquin uhuun tsain un mato yoinon. Urifi nan icon fustisi un yoimisi. Ascan Upa Diosin nantifi onihuanifotí aton niaifofin unquin. Ascacun un mato yoiquin isca huai.

<sup>15-16</sup>“Man amisi cuscan mun tapia. Ua cachiquiri huacoinyamafiashon un mato amapaiyai cuscacai man fuchipaicoianma. Ascashu ichananfiaicai ichananpaitocan man ichananma. Man fasi mutoi futsua. Ascaracai sharama. Ahuara matsisharacoin niscaquin non unimacai ayatiro. Ahuara shana shara matsinaqui non unimacai ayatiro. Ascafia ahuara catsacai non unimacain ayatiroma. Catsa muquin non michotiro. Nanscarifiai atirifi yorafo nan ahuara shana cuscarafo. Ua tanasharacoianfo. Ascan atirifi ahuara matsi cuscarafo. Uhuun tsain tapisharataicanima. Ascacun un atohuun ramapaicoin. Ascafia mancái shana yafi matisi cuscarama. Ascará itama manfin nan ahuara catsa cuscaraquin. Man uqui mutocoian. Ahuara catsa muquin non michotiro cuscan urifi un mato nansca huai. Ascashon un mato potashquin.

<sup>17</sup>“Ascan man yoimisi isca huaquin, ‘Diosin ua tapimapaiyai cuscan nantifi mun tapia. Uncái ahua futsa yopaimaran,’ ishon man anori shinanfiai mancái tapiama man chacafo huamisi. Ascacun un mato yoi. Timafin. Ua yopafiai man fasi cacapaimisi. Diosin Yoshin Sharapan mato imapaiyai cuscacai man tapiama. Manfin ahuuoma cuscarafoquin. Man imisi cuscari mun tapia. Ascan uncai ascara fuchipaima.

Ascafia un matohuunoa shinain cuscacai man tapiama. Manfin nan fusho cuscarafoquin. Fushocai ahuara ointiroma. Nanscarifiai man chaca huai cuscacai man tapiama. Ascashu man yora chitoria cuscarafofiashocai man tapiama. Nanscarifiai ua yopafiaquicai man tapiama.

<sup>18</sup>“Ascacun un mato yoisharapai man chaca huamisi cuscan huafain afanan chaca huaquima. Ua yocacahuun un mato tapimanon ahuuscashumain man ua cuscara shara itiroquin. Ascafia man chitoria cuscara. Ascacun un mato sahuuti sahuumasharai man afanan rafinonma. Nanscarifiaquin man chaca huamisi cuscan un shafacafi oincoian. Ascacun uhuunoashu fusti man maton nomuran fiananan huatiro ua cuscara shara iishquin. Man fusho cuscacoinrifi imisi. Ascacun ua yocacahuun un mato cayahuamafain uhuun tsain mato tapimasharanon. Ascan oinsharafain ua tanasharashcaquin.

<sup>19</sup>“Ascan un mato noiyamaquicai anori un mato yoicuanama. Ascafia nan un noicoiainfo fusti un ato onaintimashqui chaca shutunonfo. Ascashon nanfori un ato yoisharapai ua tanasharanonfo. Ascacun man chaca shinanmisi cuscan afanan anori shinanyamacahuun. Natian uhuun tsain nicacoincahuun un mato yoiai cuscacoin ashcaquin. <sup>20</sup>Shinancapon uhuun yoramishtichin. Un matofu rafupaicon un matoqui nocoa. Yora pushu muran iquipaquin iquisi pushu ifo cunatiro iquimanon. Nanscarifiai un matoqui nocoa mato yoiquin isca huashquin, ‘Un mifu rafupairan,’ ishon un mato yoipacumisi. Ascano tsoan ahuun nomuranshon ua nicaquin ua yoiquin isca huai, ‘Ifon, uqui ohuu. Un mia fuchipaifain un mia yopacoinran,’

ishon yoiaino un afu rafui. Arifi ufu rafuaino.

<sup>21</sup>“Ascano tsoan chaca huamisi cuscan shatufain ua tanasharacoian naanfin uhuun Upa Diosin icari ufu ipasharatiroquin. Ascafia un niaifocoin icaino nanfin niaifo patashari itiroquin. Unfin Satanás yafi yoshin chacafo finoncoianquin. Uhuun Upa Dios icariashu uhuun Upa fu un niaifocoin ica. Nanscarifiai tsoan ahuun chaca cachiquiri huafain ua tanasharacoianshu un icanoashu arifi ufu niaifo ipatiroquin. <sup>22</sup>Ascacun man pafiquiyaquin Diosin Yoshin Sharapan nan icoinra huafu ato yoiai cuscan nicasharacahuun,” —ishon Jesús nan icoinra huafu Laodicea anoafio yoya.

#### Dios icarishon ahuunoa yoisharapacunacafó

**4** <sup>1</sup>Ascashon nannori ua yoifain Diosin Yoshin Sharapan ahuara futsa ua oinmanaino nan namapan oian un huaa. Ascashon un oian Upa Diosin icaria caincaiti nam un oinyaino nan oi un nicaquin tau huaa nanrifi un afanan nica. Nan manuti nicatsa achacoin. Ascano ua yoiquin isca huaa, —Nuri uqui ohuu. Ahuarao chipo ahuouscara aashquiai cuscan un mia oinmayoiran, —ishon ua yoia. <sup>2</sup>Ua yoitapaiyaino samamashta Diosin Yoshin Sharapan ua shinamatana. Ascashon ua iquipaiyai cuscan ua iquina. Ascatori nan oi un nica ari ua iyoa. Nanno niaifoan tsaoti uhuapa shara un oian. Nocon Ifo Diosin tsaoan.

<sup>3</sup>Nan nocon Ifo fasi sharashtacoin iscará un oian. Toquiri rafutan aton anu jaspe yafi cornalina nan rafu sharashtacoin faca facaitsa rafu. Nan jaspe oshoshara. Ascan cornalina oshin chushushara. Nanscarifiai nocon Ifo sharashtacoin faca facaitsa ointsa.

Nahuan fai tonan shara cuscaraton a tsaoano tarati huua.<sup>4</sup> Nannori nocon Ifon tsaoano veinte cuatro nocofunufo tsaoti tarati huashu tsaonifo. Nan nocofunufoan Jesús tanamisifo. Nanfoan icoinra huafio aton cushumisi ipaoni. Sahuuti oshopa sharashta sahuufain maiti oro faca facaitsa sharashta maiafo.

<sup>5</sup> Ascatan nocon Ifo tsaoano canan facaiqui ointsa icain turuica nicatsari un nica. Nanscara nicaquin non tapitiro Diosin ahuamamishti huatiro. Tsoa futsacai ahun curush cuscarama. Ascatan nan Upa Diosin tsaoano siete lamparina uruaiton un oian. Nanfo uruai cuscan huaquin Diosin Yoshin Sharapan nan siete icoinra huafio ichananti pushufoti murannoafao futsafo tapimafain oinmatirofo ahuu cuscaramain Diosiqui arifi tapinonfo. <sup>6</sup> Nannori un oian ununhuan ointsa tsosi sharacoin. Ascano nocon Ifoan ahun tsaoti anori nan onihuani rafu non rafuri niafo. Furo ichapaya. Fusoqui yafi puchihuuri furo ichapaya.

<sup>7</sup> Futsarifi masharo ointsa icaino futsa moi funu ointsa ica. Ascano futsan ahun fusori nan nocofunun fuso ointsa icain futsari nan tutumanhuan noyai ointsa ica. <sup>8-10</sup> Nan cuatro putao ya seis putao ya. Nan ato putao ocuma rafu furo ichapayari. Shafatisho yafi yamatishori nan rafu non rafuri fanainquin iscafafaincani,

*“Nocon Ifo Dios fasi sharacoin. Shara fustisi huapanaca. Nantofin ahuamamishti huatiroquin. Iyopaonishaqui natianri ipamisi. Ascashuri ipanacaran,”* icashu nan rafu non rafuri fanainriacani. Ascashon yoiafori isca huaquin, *“Nocon Ifon Diosin mirus fusti min nocon Ifocoin. Tsoa futsacai mia cuscara sharama. Min isharapacunaca. Ascacufin non mia fasi noiquin aicho huai. Min noco shara huafafaini,”*

ishon nan rafu non rafuriton yoiriaifoanno nan icoindra huafio cushumisifo veinte cuatrocain nocon Ifo Diosin ahun tsaoti camaqui tsaoa naman fuoshopacufoan aton maiti oro ointsa sharashtacoin nocon Ifo tsaoa afofori nannosi huacashon yoiafo isca huaquin,

“Nocon Ifo Diosin min noco maiti inan cuscan non mia afanan nasoin. Man min noco inanfiacun non mia fasi noicoinquin noco maitifo non mia afanan nasoin. Ascan mirus fustifin min noco iquitiroquin. Min nocon Numamisi. Ascashu mirus fusti min nocon Ifocoin. <sup>11</sup> Ascan minfin isharamisiquin. Ascacun mihiuunoa fusti non yoitiro isca huaquin. Min nocon Ifocoin. Min nocon Dios. Tsoa futsacai mia cuscara sharama. Min isharapacunaca. Ascacufin non mia fasi noicoinquin. Ascan minfin min shinapasi ahuamamishti huatiroquin. Min nantifi ahuamamishti onihuani. Min apaiyai cuscan fusti nantifi min onihuani. Ascacun minihuunoashu fusti nitiroforan,” ishon nan Jesús tanamisifo veinte cuatro yorafoan yoiafo.

**Jesús nan chashoan facu  
cahuashara cuscarraton cununi  
cuscahuunshon noco tapimani**

**5** <sup>1</sup> Ascatan afanan un oian cuscan un mato tapimai. Nocon Ifo Diosin ahun tsaoti camaqui tsaoshon ahun mucu mumiori papel ocuma rafu cunua sufishon tsoma. Ascashon siete tashna huatinin tashna huua. <sup>2</sup> Ascashon un oian Diosin oinmati mutsisipacoin nan afu nai muran ica. Nantori oi ashcafarin cunaquin isca huua, —Na cunu non oinpai. Ascan chaca huamisima fustiton

na tashna huatifo fuputiro na cunu non oinon. ¿Ascan tsoan chaca huamisimamun na cunu ahuun tashna huatifo noco fupushona non oinon? —ishon oi ashcafinitin yoia.<sup>3</sup> Ascafia nan nai murannoafu futan mai anoafu non Diosin oinmatifu afu ifiashocai tsoashtacai cunu fupushotiro amuran oinonfo.

<sup>4</sup> Ascacun uaiyanan un yoia, —¡Ohushta! Chaca huamisimacai tsoan fuchiama na cunu noco fupushonon amuran non oinon, —ishon un shinan. Ascacun un fasi uairia.<sup>5</sup> Ascaiton nan veinte cuatro icoinra huafu aton cushima futsan ua yoiquin isca huaa, —Uaiyamahuu. Oinpon. Nocon Ifo nia. Cristo nanfin nocon niaifocoquin. Rato yoinacai nan masharo uhuapa cuscara mutsisipacoинma. Nanscarifiai Cristo Israelfioan aton niaifo mutsisipacoин. Nanton ahuamamishti huatiro. Tsoa futsacai a cuscarama. Ascacun anu futsamisifo isca huaquin, “Judápan funafo nan masharo curush cuscara coinforan,” huamisifo. Ascacufin nocon yorafoan aton niaifo David ipaoniquin. Ascan nan David ahun funa natian nuno Upa Dios fu ica. Ascacun nanton nan siete tashna huamua noco fupushotiro nan cunu non oinon. Ascacun afanan uaiyamahuu, —ua huaa.

<sup>6</sup> Ascatan nannori chashoan cahuashara fustifia ahuun masho siete nantirifi ahuun furo un oian. Rutuafu ointsaia Diospan tsaoti ano nia ica. Nannorifi nan rafu non rafuri Diosin onihuia yafi nan veinte cuatro icoinra huafu cushimafoan tarati huayacunafo. Tsoa futsacai a cuscarama. Nanton ahuamamishti huatiro. Diosin Furun manifoti ano nichian ahun Yoshin Sharahuunshon nantifi yorafo onancoinon.<sup>7</sup> Ascan Upa

Diosin nan cunu ahuun mucu mumiori tsomacun nan Jesús chashoanun facu cuscaraton man fia.<sup>8</sup> Fishon nan rafu non rafuri Diosin onihuani yafi nan veinte cuatro icoinra huafu cushimafoan fuoshopacufoan manuti guitarra cuscarafo yafi tutsofo nanfoan tsomafo. Nan tutsofo oro faca facaitsa. Nanfo muran fiin otano ahuun coin tipoi ininsharayacoin. Nanscarifiai Diospan yorafoan a cufaiton Upa Dios nan icarishon ato nicamisi.

<sup>9-10</sup> Ascano nantianri nanfo fanainti funapan fanainquin iscafo,

“Min chaca huayamafiamisicun mia rutunifo.

Ascashu nantifi yorafo manifoti min noco nashocai min imi foni

Satanás afanan nocon ifo itama Upa Diosin ahuun yorafo non inon.

Ascacufin mirus fusti nan cunu Upa Diosin tsoma min fitiroquin.

Ascashon ahuun tashna huamuafu min noco fupushotiro amuran cunua cuscan noco tapimashquin.

Mihuunshon mia icoinra huafoti Diospan yorafo itirofo.

Ascano nanfoanri futsafo min tsain shara ato tapimanano min ato amapaiyai cuscan anonfo.

Ascacun non maifoti anoafaoan niaifo patashari iishquiran,”

icashu fanaincafo.

<sup>11</sup> Ascatan un oianri Diosin oinmatifu afu nai muran icafo ichaparasicoin tsoanci ato tanan huatiro. Nanfo fanaincafoan oinfain un ato nica. Diosin tsaoti ano tarati huayacunafo nan Diosin onihuani rafu non rafuri non nan Jesús icoinra huafu cushimafoan veinte cuatro naqui huayacunafo. Ascashu nanfo ya osiashu

Diosin oinmatifo fu fanaincaifoan un nica.

<sup>12</sup>Fasi oi ashcafinitin fanaincanti iscafo,

“Diospan facu Jesús chashoan

cahuashara cuscara

sharashtacoin man rutunifo.

Ascafia natian nantifi manifoti ato

iquifain

nantifi nai murannoafoti yafi mai

anoafori ahuuna iquin.

Naantofin nantifi tapicoianquin

ahuun curushhuunshon

ahuamamishti huatiro.

Ascacun nantifiton min

sharacoinran mia huapanonfo.

Mirus fustifin min nocon Ifo iquicain.

Ascacun iAicho! Min nocon Ifo

ishara fustipacunacaran,”

icashu fanaincanti.

<sup>13</sup>Ascatafin un nica nantifi nai

murannoafu fanaincaino mai anoafori

fanaincaino unuhuan anoafori

fanaincanti iscafo,

“Upa Diosin ahuun tsaoti ano tsaoa.

Furun Jesús chashoan facu

cuscara sharashta

nan rafu nocon Ifo

isharafustipacumisifo.

Ascacun nantifiton man

sharacoinran ato huafain

man fusti nocon Ifocoin

ahuamamishti man huatiroran,

ishon yoipacunonfo,”

icashu fanaincanti.

<sup>14</sup>Ascataan nan rafu non rafuri Diosin

onihuanifoan yoiquin isca huafo, —iAicho!

Nanscasi ipanon. Amen, —icaifoanno nan

veinte cuatro Jesús icoira huafo

cuendumisifo nan Dios yafi Furun nanman

fuopacufoannafo. Nanfoanrifi Upa Dios

yafi Jesushuunoa yoisharafo.

#### Nan tashna huati siete

**6** <sup>1</sup>Ascataan un oian nan Jesús  
chashoan facu cuscaratón nan cunu  
tashna huamua siete tsoma. Ascashon

fusti fupua. Fupuaino un nica nan rafu  
non rafuri Diosin onihuani futsan ahuun  
oi ashcafinitin yoiai cuscan nan turuica  
nicatsaton yoia, —Ohuu, —yoní.

<sup>2</sup>Ascacaino caballo oshopa ua chaima  
nocotoshiaiton un oian. Nan caballao  
camaqui tsoaran piyacati tsomashu  
tsaocun niaifoan maiti maimana. Man  
maimanano nannoashu caballo camaqui  
man caa. Nantorifi futsafo iquipaiyai  
cuscan man iquini caa. Ascaitocai  
tsoashta nitun huatiroma. Nantomain  
nantifi finoncoincun.

<sup>3</sup>Ascataan Jesús Diospan facu nan  
chashoan facu cuscaratón afanan nan  
cunu tashna huamua futsan fupua.  
Fupuaino un nica nan rafu non rafuri  
Diosin onihuani futsan afanan yoia isca  
huaquin, —Ohuu, —yoní. <sup>4</sup>Ascaino  
caballo futsari oshininpá nocotoshia.  
Nan caballo camaqui tsaocun nopus  
chainipa inanfain yonoa mai ano  
catanon. Ascataan nocoshon maifoti anoa  
ato shinanmana afanan  
unimasharatamarocon  
noicasmatanancanashu rutunanonfo.

<sup>5</sup>Ascataan Jesús chashoan facu  
cuscaratón afanan nan cunu  
tashnahuamua futsari fupua. Nan  
fupuaino un nica nan rafu non rafuri  
Diosin onihuani futsan afanan yoia isca  
huaquin, —Ohuu, —huaino caballo  
futsa fisopari nocotoshiaiton un oian.  
Nan caballo camaquiri tsoanra tsashon  
ahuun ihuu tananti tsoma ica. <sup>6</sup>Ascaino  
nantianri un oi nica nan rafu non rafuri  
Diosin onihuani nastumai un nica  
yoiquin isca huaiton, —Tushu  
yamaicuana iiishquin. Nan aya cuscafia  
fasi chicoin. Nocofunun shafa fusti  
yonoshon ahuun rafanan trigo kilo fusti  
fitiro ascayamarai arroz kilo rafu non  
fustisi fitiro. Afanan pipaifia ahuun pui  
tushuama ahuara futsa afanan fipanan.  
Ascacun shuni yafi nan fimi uva ahuun

unu chacana huayamahuu, —ishon yoia.

<sup>7</sup>Ascano afanan Diospan facu nan chashoanun facu cuscаратон afanan nan cunu tashna huamua futsari fupuaino un nica nan rafu non rafuri Diosin onihuani futsan afanan yoiquin isca huua, —Ohuu, —huua. <sup>8</sup>Ascan caballo futsa fasi pashicoin nocotoshiaiton un oian. Nan caballo camaqui futsari tsaoa ahuun anu Namamisi. Nanton yorafo namatiro. Ascashon nantori yoia isca huaquin, —Un yorafo namapairan, —huaiton Diosin yoia, —Ai. Min atiroran, —huua. Nan Namamisi cachiori futsan oa. Ahuun anu Namisifoanno ica. Ascano nan namamisihuunoashu mani futsafoya futsafo rutunancani atirifi tushuoma fonicani naifoanno atirifi pau futsa futsatapafoan ato namaino atirifi yoinafoan ato rutua nacani. Ascashu fasi yorahuanrasi nashcani. Tsoan ato tanan huatiroma un oian.

<sup>9-10</sup>Ascatan afanan Jesús nan cunu tashna huamua futsa fupua. Fupuaino un oian nan Jesús icoimra huashu namisifo. Niyopaonifotian Diospan tsain futsafo yofain Jesushuunoari yoifoanfafainpaonifo. Ascaifoan ato rutunifo. Ascashu nanfo Jesushuunoashu nani. Natian un oian aton furo yoshinfoan Dios cufiti ano ichanancashon oi ashcafinitin yoiafo isca huaquin, —Nocon Ifo Diosin, min nantifi onancoian. Min ahuamamishti huatiro. Min isharafustimisi. Mincai ahuashta chaca huamisima. Min iconmisi. Nan mia icoimra huamafoan mai anoshon noco rutunifo. Ascacun ahuitianmun min ato onaintimaicain, —ishon yoiaifoan. <sup>11</sup>Ato yoiqui isca huaquin, —Manayocahuun. Funacaquima. Futsafo mato cuscarafori uhuunshon uhuunoa yoimisifo iishcani. Ascacun nanfo mato

cuscara uhuun oinmatifo arifi iishquicani. Nanforifi uhuunshon yora chacafoan ato rutushcani. Ascan ahuun unutaqui ato rutuafono mato ano nocoshcani, —ishon nocon Ifoan ato yoia. Yoitan sahuuti osho chainipa sharashtacoin ato inan. Nanfoanmain mai ano niyoshon Upa Diosin tanasharamisicun ato inanyama.

<sup>12</sup>Ascatan Jesús nan chashoan facu cuscаратон afanan nan cunu tashna huamua futsari fupuaiton un oian. Fasi curushcái mai nayanaiyaicain farin afanan chashayamaino nan sahuti cushto fisopaton fupoa cuscara faquishcoin icain oshu oshicoin imi ointsa icain. <sup>13</sup>Nihuu curushpacoin nocoquin fana higuera ahuun fimi oshianfo unutaquin niriatiro. Nanscarifiai fishifo nai murannoashu mai ano pacuafó. <sup>14</sup>Nainhuan miscoacunfoanni ointsa yamariscatanaino machihuan yafi mai toomanhuan naiyanaiyaicaino futsa ano shucucaina.

<sup>15</sup>Ascaino nantifi mai anoafó ratucoianfo. Manifoti aton niaifofo non niaifo patasharifo non ranushumuafaoan ato niaifofo non mafo ichapayafo non yora mutsisipafó non oinmatifo non ifomaisifori nantifi ratucoianfo. Ascano atirifi mahua quini uhuapa muran ichoafó onupaicani. Atirifiri machi cuya ano ichoafó toquirininhuan ananmanri onupaicani. <sup>16-17</sup>Ascatan fasi fiisiyanan yoiafo isca huaquin, —iOhuashta! Upa Diosin nai murannoaton ahuun Furun Jesús nan chashoan facu cuscara natian nocoquí sinacoin. Ascacun non ahuuscatiromun omitsiscashquima. Tsoashtacain Diosin numatiroma noco onaintimanonma. Ascacun na machi cuyafo yafi toquirininhuan noco camaqui pacupainon Diosin noco fuchishon noco omitsisca huanonma, —ishon nan nicacasmamisifoan yoiafo.

**Diosin ciento cuarenta y cuatro mil ahuun  
yorafo cushushquiai cuscan**

**7** <sup>1</sup>Ascatan afanan un oian cuscan un mato tapimai. Diosin ahuun oinmati rafu non rafuri afu nai muran imisifo un oian. Futsa fari oaiquiri niaino futsari fari caiquiri nia. Ascan futsa fari oai istafari niaino futsari fari cai istafari nia. Ascaino nihuun nishmapacufoanna. Afananricai nantifi maifoti anoa nii puifo puricama. Unuhuanri afanan fuchoima pusiquima raca. <sup>2</sup>Nan rafu non rafuri Diosin ato yonoa mai yafi unuhuan chacana huatirofo. Ascano Diosin oinmati afu nai muran ica futsari nan fari oaiquirinoashu oaiton un oian. Nocon Upa Diosin nan nipanacaton ahuun sello ya oa. Nan Diosin yonocun ahuun yorafotihuun nutatiro nantifain tapinon Diospan ahuun yorafocun.

<sup>3</sup>Nan oquin Diosin oinmati rafu non rafuri ato oi ashcafinin yoia isca huaquin, —Manayocahuun. Diosin tanamisifo iquisi fumananqui un ato Diosin anu nutayonon nanfo Diospan yorafocun nantifain tapinonfo. Ascacun non acataima ahuara mai anoaflo yafi unuhuan anoafori chacana huariyamacahuun, —ishon ato yoia. <sup>4</sup>Uun nica 144,000 Israelifoan aton fumananqui Diosin oinmatinin Diosin ahuun anu man ato nutan. <sup>5-8</sup>Nocon shuni Israeli ahuun facufo doce furonanfacufo cainni.

Iyoatón ahuun anu Judá.  
Judá cachiori Rubén.  
Rubén cachiori Gad.  
Gad cachiori Aser.  
Aser cachiori Neftalí.  
Neftalí cachiori Manasés.  
Manasés cachiori Simeón.  
Simeón cachiori Leví.  
Leví cachiori Isacar.

Isacar cachiori Zabulón.  
Zabulón cachiori José.  
José cachiori chipo facucoint Benjamín.

Nan doce fustirasi pashcanain futsuashu icafo. Ascan nan shoco futsafo anoashu caiafo aton funafo doce mil Diosin ato catonni.

**Yorahuanrasifain ato sahuuti  
oshopa sahuuafó**

<sup>9</sup>Ascatan Upa Diosin yafi Furun nan chashoanun facu cahuanshara cuscara tsaoano yorahuanrasi niafo tsoancai ato tanan huatiroma. Nan maifoti anoafo manifotifain sahuuti oshopa chainipa sahucashon upu tsomafo. <sup>10</sup>Nanfoan oi ashcafinin yoiafo isca huaquin,

“Nocon Upa Diosin futan Furun Jesús noco nimapacuafó. Nocon Ifo Jesús nan chashoan facu cahuanshara cuscara nocohuunoashu nani nocon chaca soashoshquin non afu nipanon,”

ishon yoiafo. <sup>11-12</sup>Ascatan Nocon Ifo tsaoano ahuun oinmatifo afu nai muran imisifo non Jesús tanamisifo ato cushumisifo yafi nan rafu non rafuri Diosin onihuani nanfo nanno niafo. Ascashon ratoconun mai chachishon fuoshopacufoantan Dios yoisharaquin isca huafó,

“iAicho! Mirus fusti min icocoin. Min isharapacumisi. Mirus fustirifi min noco imasharatiro. Min nantifi onancoian. iAicho! Non yopai cусcan min noco ashomisi. Ascacun nantifain min sharacoinran mia huapanacafo. Minfin ahuamamishti huatiroquin. Min nancasi huapanaca. Nancasi ipanon. Amen,”

ishon yoiafo.

<sup>13</sup>Ascacun Jesús tanamisifo aton cushumisiton futsan ua yoca isca

huaquin, —¿Na yorafo sahuuti osho chainipa sahuuafu raniashu fuafomun min tapiamamun? —ishon ua yoca.  
<sup>14</sup>Ascaiton un cuma, —Ma. Uncai tapiama. Minfin tapiaquin. Minfin ua yoitiroquin, —un huaiton. —Nanfo fasi omitsiscani. Ascaifoan Diospan Furun nan chashoan facu cahuanshara cuscaraton ato nashonihuunshon ato chaca soashona ato imasharanon. Nanscacun ato sahuuti oshopa shara sahuumana.

<sup>15</sup>Ascashu Upa Diosin icano afu imisifo. Afu ishon nan Upa Diosin ato yonoa cuscan ashopacunacafo. Ascacun ato cushufafaini ahuara chacafo atoqui noconomia. <sup>16-17</sup>Diospan Furun nan chashoan facu cahuanshara cuscar Upa Dios fu imisi naanfin ato cushumisi ipashquiquin. Ascanocai afanan tsoa fonyiamacai nomipacunacafoma. Afananricai farin ato tsacaima. Ascashon Jesús ato iyoaino unimapacunacafo. Ascacun Upa Diosin aton ointi fupuashoshquin afanan uainonfoma, —ishon yoia.

**Nan tashna huamuafu Jesús ahuun  
unutaqui fupua**

**8** <sup>1</sup>Ascatan ahuara iishquiae cuscan ua oinmayoa. Jesús Diospan facu nan chashoanun facu cahuanshara cuscaraton cunu tashna huamua siete man fupuquin tau huayo. Ascan natian ahuun unutaquin futsari fupuaiton un oian. Diosin icano nai murannoashu nantifi media hora puusiyofoma.

<sup>2</sup>Ascatan Diosin ahuun oinmati siete afu nai muran icafoan atoti manuti inanpacua chipo ato yoiaitan chaan chaan ashquinonfo.

<sup>3</sup>Ascaino Diospan oinmati futsan paran uhuapamashta oro faca facaitsu tsomashu Upa Dios cufiti ano nia un oian. Nan paran uhuapamashtanun

ahuara inin shara coaino fia. Ascan nantifi Diospan yorafoan cufimisifo cuscan osishon Dios cufiti camaqui huaa. Nannori chaima Diosin tsaoa. <sup>4</sup>Ascano nan oinmati Dios fu nai muran imisi paran uhuapamashta tsomashon ahuun coin tipoi inin shara nai muran man foa. Nanscarifiai Diospan yorafoan cufiaifo cuscan Upa Diosin nan icarishon nicatiro. <sup>5</sup>Ascacun Upa Diosin man itishara huaa maifoti anoafu nan icoirua huafoma ato onaintimashqui. Ascashon ahuun oinmati yonoa afanan paran uhuapamashtanun cufiti sapa muran chi fospi huanon. Fospi huatan nai muranshon mai ano man pota. Ascaino mai ano fasi curushcái turuica achacoin nicafain canan piishicain mai nayanaiyaica.

**Oinmati afu icafoan manuti  
chaan chaan acani**

<sup>6</sup>Ascatan Diosin ahuun oinmati siete afu nai muran icafo atoti manuti inan itishara huafu chaan chaan ashcaquin.

<sup>7</sup>Ascan futsan ahuun manuti chaan chaan acaino uno matsi tocoromishti yafi chii imia osia mai ano pacua. Ascaino mai cashcu futsa man coi cuyo. Un tercero del maitio man coi cuyo. Nantifi mai anoa fasifo yafi ihuifo man coi cuyoari.

<sup>8</sup>Ascatan Diosin oinmati futsanri ahuun manuti chaan chaan acaino machi uhuapa chi urumanhuan ointsa Diosin nai muranshon potaino unuhuan muran pacua. Ascano unuhuan cashcu futsa imi ica. La tercera del unuhuan imi ica. <sup>9</sup>Ascaino atirifi unuhuan muran icafo man nai cuyoafu. Atirifi la tercera de shashohuanfori man coi cuyoafu.

<sup>10</sup>Ascaino Diosin oinmati futsan arifi ahuun manuti chaan chaan acaino fishi uhuapacoin chi uruai cuscara nai murannoashu pacua. Atirifi unufo muran

man pacua. Fishihuan chi uruai cuscara la tercera unufoqui man pacua. Ascashu unu tsosia sharafoquiri man pacua.

<sup>11</sup>Nan fishihuan ahuun anu mocacoinran huamisifo. Nan unu muran pacuano la tercera unu mocha ica. Ascacun yora ichaparasi nan unu ayacanashu nai futsuao.

<sup>12</sup>Ascatan Diosin oinmati futsan arifi ahuun manuti chaan chaan acaino farin la tercera afanan chashasharama oshuri la tercera afanan chashama. Ascaino la tercera fishifoanri afanan chashafoma. Ascashu shafata cuatro horas faquishia. Yamuri cuatro horas fasi faquishcoin.

<sup>13</sup>Nanfо un oiainno un oianri Diospan oinmati tutumanhuan cuscara fasi cuya noyaiton un nica. Naanton oi ashcafinitin yoiquin isca huа,—iOhuashta! Diosin oinmati afu nai muran icafo rafu non fusti futsan aton manuti chaan chaan acaino mai ano icafo fasi mimacaia omitsiscashcani. Ascacun iAi timafin! —ishon yoia.

**9** <sup>1</sup>Ascatan Diosin oinmati futsan arifi ahuun manuti chaan chaan acaino Diospan tsoara futsa nai muranshon mai ano nichian. Ascan fototan nan yoshin chacafо quininhuan faquish muran icafo ano caa. Nan quininhuan fupotiya. Ascan amurannoafocai ahuuscashu caintirofoma. Ascafia nan nai muranno fotomana Diosin shafi inan quininhuan faquishi muranno ato caimanon.

<sup>2</sup>Ascashon ato cainmatanaino nan mai quininhuan murannoashu coinmahanfoya nai muran foao. Ascaino fari chashasharayoama. Nantio nai faquishcoin iyoa. <sup>3</sup>Ascatan nan coinmahan murannoashu ocutsuru cuscarafo ichaparasi mai ano nichian. Diosin ato fasi pofucoint ima inapapia cuscara inonfo.

<sup>4-5</sup>Ascashon ato yonoa isca huaquin, —Mai anoafо fasifo yafi fanafo non

ihuifori chacana huayamacahuun. Ascan tsoan uhuun yorafoma aton fumananquiri uhuun anu nutamuafoma nanfo fusti man ato tucatiro. Ascafia ato rutuyamacahuun. Ato rututama mucu fustiti oshu man ato omitsiscahuatiroran, —ishon ato yonoa. Ascacun ato tucafoanno nan icoingra huamafo inapapia muutsa mucani fasi omitsiscofa.

<sup>6</sup>Mucu fustiti oshu nanscara mucani nan icoingra huamafo tunuyamacaina aafin napaiifo. Ascashon yoiqui isca huа,—iOhuashta! Uncai tunutiroma. Un naafin shara itiroquin, —ishon yoiafo. Ascafia ahuuscashucai natirofoma.

<sup>7</sup>Ascan natian nan ocutsurufo ahuu cuscaramainquin un mato tapimai. Caballo iquisi itishara huatirofo futsafo rutuifoshcaquin. Nanscarifiai nan ocutsurufo nan caballo cuscara ointsafo. Ato maiti oro cuscara sharashtafo maiafo. Aton fusorifi nan nocofunun fuso ointsa. <sup>8</sup>Aton foo ainfoan foo ointsa ato shutarifi masharonun shuta ointsa icain <sup>9</sup>Aton shochi ano cuno ointsaton shofucumuafо ahuaraton ato tsacapaiyaino amuran iquinonma. Ascashon aton putao pua puaiquin achacoin nan caballofoan ahuun taramuti tarafoaino futsafoya rutunain nicatsa. <sup>10</sup>Ascatan nantifi tsitsisiyao. Naanton yorafo chachiano isin mutiro inapapia mutsa. Ascashon ato tsitsisin yorafo omitsicu huatiro. Mucu fustiti oshu ato isinummatiro. <sup>11</sup>Nan quininhuan faquish muran yoshin chacafо icafoan aton niaifoan ahuun anu Israeli tsainman Abadón. Griego tsainmanri ahuun anu Apolión. Onicoinnin tsainman yorafo rutumisi.

<sup>12</sup>Ascan man chaca finonquin tau huа. Ascan nan rafu nocoataima.

<sup>13</sup>Ascatan Diosin oinmati afu ica futsan ahuun manuti chaan chaan

acaino. Anoshon Dios cufiti acamaqui nan rafu non rafuri moi masho ointsa oro sharashtacoin nan nushmancayanoa oi un nica. Cufimisifo ano un oi nica.  
<sup>14</sup>Nan oin Diosin oinmati afu icaton manuti tsoma yoiaiton un nica isca huaquin,—Nan rafu non rafuri yoshin chacaflo Upa Diosin ato munushua nan unu uhuapa ahuun anu Eufrates anoa ato muputahuun fononfo,—ishon yoia.  
<sup>15</sup>Nanno nan yoshin chaca rafu non rafuri afin itisharamisifo. Ascan rato hora yafi rato shafatan non rato oshu non rato farimain ato caimanaitian atirifi yora mai anoao la tercera yorafo ato rutushcani.  
<sup>16</sup>Ascashon un nica yorahuanras dos cientos millones ranushumuaflo caballo camaqui tsaoaflo futsafo rutui foshcaquin.

<sup>17</sup>Ascatan Upa Diosin ua ismani nan ranushumuaflo yafi ato caballofo un oian iscara, Nan caballo camaqui tsaoafoan aton shochi nan chii rucun cuscara cuno oshin shara non tonancoin non chashnanpan shofcumuafo. Ascan nan caballofoan aton mapo masharo mapo ointsa. Aton ashfan murannoashu coin yafi chii uruaino azufre ashfacanun siiquin.  
<sup>18</sup>Nanfoan yora ichaparasi man namafo. La tercera manifoti man ato namafo.  
<sup>19</sup>Aton ashfa futan ato inan yorafo rututiro. Aton ina nan rono paupaton ina cuscarafo. Nanfoan yorafo omitsisca huaflo nanonfo.

<sup>20</sup>Atirificai afohuunoashu nayamafiacani aton chaca shatuafoma Upa Dios tanashcaquin. Ascatamarocon yoshin chacaflo tanamisifo cuscan shatuyamafain oro iyamarai cuno oshopa sharashta non cuno futsan ahuun anu bronce non toquiri non ihuirifi ramihuaflo. Ascafia nanoanci ahua oinyamafain nicatirofoma raquiri cahuascatirofoma,—Naan nocon Dios. Non ahuun noiran,—ishon yoimisifo

cuscan shatuafoma.  
<sup>21</sup>Ascashon chaca futsa futsatapaflo huamisifo cuscan shatuafoma. Rutumitsamisifo cuscari shatuyamafain shointian cuscan shatuyamafain nocofunufo aton ahuinma fu imisifo cuscan shatuyamafain ainfofori nanscarifiaifono. Onumisifo cuscari shatuafoma. Ascashu nanfo chacacoinfashion tsoan aton chaca shatuafoma nocon Ifo Jesucristo tanasharashcaquin.

### Upa Diosin ahuun oinmatinin nan afu ica papel uhuapama cunua sufia tsoma

**10** <sup>1</sup>Ascatan un oian Diosin ahuun oinmati afu ica futsa mutsisipacoin nai murannoashu fotoaiton. Coin camaqui fotoaiton ahuun caya un oian iscara. Maiti nanhuanfai ointsa maia. Ahuun fuso fasi chashacoian fari ointsa. Ahuun quishi rafu chi ointsa.  
<sup>2</sup>Ascashon papel uhuapama cunua sufia tonoshon tsoma. Ahuun tau mumiori ununhuan fumancayan paicain ahuun tau mushquiori mai ano paia.  
<sup>3</sup>Ascatan oi ashcafain cuna nan masharo uhuapaton ahuun oi nicatsa. Ascaiton nan siete turuica curushcain oi uhuapaton futsan cuma.  
<sup>4</sup>Ascacun nan yoiafo cuscan nicashon un cunucuana. Ascafia nai ari Dios icarishon oi futsan ua yoiqui isca huaa,—Min rama nica cuscan cunuyamahuu. Aton tsain tsoa tapimayamahuu,—ishon ua yoia.

<sup>5-7</sup>Ascatan Diosin ahuun oinmati afu nai muran icaton mutsisipacoin unuhuan yafi mai ano paishon ahuun mucu mumiori mushainacahuan yoia isca huaquin,—Upa Diosin nipanacaton nai yafi nantifi nai muran icafo onihuafain mai yafi mai anoao onihuafain ununhuan yafi unuhuan muran icafori onihuani. Nanhuunshon

un yoiquin isca huai, Upa Diosicai afanan ato manaima. Ahuun yoishomisifo tapimapaoni cuscacai futsafoan tapipaonifoma. Ascafia natian Diospan oinmati afu ica futsan ahuun unutaqui manuti chaan chaancaino ato tapimayoni cuscan nantifi nanscacoinschinran, —ishon Diosin oinmatinin ua yoia.

<sup>8</sup>Ascan nan oi nai murannoia un nicanon afanan ua yoia isca huaquin, —Nan Diosin oinmati afu ica unuhuan yafi mai ano nia. Nanno aqui catahuun. Ascashon nan papel sufia tonoshon tsoma fianhuun, —ishon ua yoia.

<sup>9</sup>Ascan cashon Diosin oinmatiqui nocoshon un yoia, —Nan papel sufia uhuapamashta ua inanhuan, —un huaiton. —Fihuu. Ascashon pihuu. Piqui min mui min ashfa muran fata sharacoin fona cuscara. Ascan man shuashon min mui min shaqui murannoashu mocacoin iquin. Ascashon min tapitiro Diosin tsain shara iconcoin. Ascatori min tapitiro nan tsain yoia cuscacoin yorafo omitsiscashcani. Mirifi min tapiaino min fasi shinantiroran, —ishon ua yoia.

<sup>10</sup>Ascacun un papel sufia uhuapamashta fitan un pishon uhuun ashfa muran un mua fata shara fona mutsa. Ascafia un shuashon uhuun shaqui muran un mua mocacoin. Nanscarifiai ua yoia cuscan huafain ua isma cuscari uhuun nomuran un nanuashu un unimacoinna. Ascafia nan tsain inon pacuai yoia cuscan yorafo omitsiscashcani. Nan oinquín un fasi shinan. <sup>11</sup>Un asca huano afanan ua yoia, —Diosin ahuun yorafo yoipaiyai cuscan afanan ato yoihu. Ahuarao iishquiae cuscan yorafohuunoa yoifain manifotihuunoa yoifain niaifofohuunoari ato yoihu, —ishon ua yoia.

Nocon Ifo Jesús yorafo yoipaiyai cuscan nocofunu rafutan ato yoishquicani

**11** <sup>1</sup>Ascatan tsiquiti cuscara tananti ua inan. Ascashon ua yoia isca huaquin, —Dios fu tsainti pushu ahuun chainipa yafi ahuun nashfa muranri tanantahuun. Anoshon Dios cuftiri tananfain ahuun yorafoan ahuititomain nocon Ifo Dios noiquin fanainshocain a cufiafori ato tanan huahuu tapishquin. <sup>2</sup>Ascashon Upa Diosin yonoa cuscan Israelimafo pushu umainti fusti nocoshcani. Fari rafu non fusti nushmancayan Israelimafoan Jerusalén chacana huashcani. Ascan nan Israelimafoancai Jesús icoinra huafoma ascashucai Dios fu tsainti pushu muran tsoa iquitirofoma. Ahuun unmainti fusti fotirofo. Ascacun unmainti tananyamahuun. <sup>3</sup>Ascacun nantianri un nocofunu rafu Jerusalén ano nichishquin. Nanno icafo un ato yoipaiyai cuscan nan rafutan ato yoishquicani. Fari rafunon fusti nushmancayan atohuunshon nan Jerusalén ano icafo un ato yoishqui. Ascashon nan rafutan sahuuti chocashta sahuucashon atohuun ramapaicoquin ato ismashcani. Uhuun curushhuunshonri ahuamamishti huashcaniran, —ishon Diosin ua yoia.

<sup>4</sup>Ascashon Diosin ahuun yorafo yoipaiyai cuscan nan rafutan yoimisifo. Nan rafu nii ahuun anu olivo cuscara. Nan olivo shuni ichapaya. Nanscarifi aquín nan rafutan Diospan Yoshin Shara nanuao. Nan rafu lamparina ota cuscara. Faquishiaino lamparina otacun non shafacafi oincointiro. Nanscarifiai futsafoan nocon Ifoan tsain shara tapiyamaifoan nocon Ifoan ato yoipaiyai cuscan nan rafutan ato tapimatiro. Ascashu man itisharamisifo ahuun Ifoan tsain shara yorafo yoishcaquin. <sup>5</sup>Tsoara

futsan nan Diospan tsain yoimisi rafu noicasmafain chaca huapaiyaiton nan rafutan aton ashfa muranshon chii siiatanaino ato namashquin. Ascacun tsoan ato chaca huapaiyai nan yorafin naashquiquin.

<sup>6</sup>Ascashon Upa Diosin ato yonoaino nan rafutan Diospan tsain futsafo yoiaitian aton tsainmansi yoitirofo afanan oi fuyononma. Ascatan unufo yafi ianfo non unuhuan nanfori aton tsainmansi unu fiananan huariscatiro imi inon. Asca huapaiquiri aton tsaimansi pau futsa futsatapafo yorafo fuchimatiro.

<sup>7</sup>Ascano Diosin ahuun yorafo yoipaiyai cuscan nan rafutan ato yoiquin anaitiano nan yoshin chaca quininhuan faquish murannoashu atoqui nocoshon ato rutupai oa. Ascashon man ato rutua. <sup>8</sup>Ascatan nan rafu Jerusalén anoashu naacanashu aton caya fai ano racafo. Nannoshorifi noco Ifo mastanifo. Ascacun Jerusalén ano icafo yoitirofo nan Sodoma yafi Egipto anoafu cuscura. Nannoshon fasi chaca huapaonifo. Dios yafi ahuun yorafo noicasmapaonifo. Asca Jerusalén anoafofin nanscaraoquin. Ascacun nannoashu nan rafu naacanashu aton caya fai ano racafo.

<sup>9</sup>Ascacun maifoti yafi manifoti tsain futsa futsatapafo nan Jerusalén ano ichananfo nan rafutan aton caya oinpai fuafu. Ascafia niaifofaan yonocun tsoancai aton caya mai huatiyo icama. Osha rafu non fusti nushmancayan aton caya racacun oinriafo. <sup>10</sup>Ascano nantifi yorafo fasi unimacaquin yoiavo isca huaquin, —iAichofain! Nan Diosin tsain yoimisi rafutan nocon omitsisca huamisifo cuscan afanan noco asca huacanimaquin, —icashu yoinanfo. Ascatan unimacaquin ahuarao cashman afiranana inanonanfo.

<sup>11</sup>Ascafiaifoanno osha rafu non fusti nushmancayan finontan Upa Diosin ato nimiriscatanaino funinaca huanafo. Ascaiton oincani fasi ratucoinican fiisicani. Taritaricafo. <sup>12</sup>Ascan nai muran Upa Dios icariashu fasi oi ashcafinin ato yoiaiton. Nan rafutan nicafo. Ato yoiquin isca huaiton, —Nuri fucahuun, —ato huatapaiyaino ato noicasmaifoan oiainfoanno nan rafu atomaquinoashu coin muran Upa Dios icari foafo.

<sup>13</sup>Fotapaiyaifoanno mai ano fasi curushcain naiyanaiyaishquin. Ascaino atirifi pushu Jerusalén anoafu maocomushquiai cuscan un oinyoa. Ascaino siete mil yorafo man naafo. Nan tushuafu fasi ratucoinanfo, —Shinancapon. Upa Diosin nai muran icaton ahuamamishti huatiroran, —icashu yoinanshcami.

<sup>14</sup>Ascatan nan mai anoashu omitsiscaiyoi rafufiashu samamashtacoin afanan omitsiscashquin.

Diosin ahuun oinmati a fu nai muran  
imisiton ahuun unutaquin manuti chaan  
chaan aca

<sup>15</sup>Ascaino Diosin oinmati afu ica futsan ahuun manuti chaan chaan acaino nai muran Upa Dios icarishon oi ashcafinin yoiavo isca huaquin,

“Natian nocon Ifo Diospan Facu nantonfin nantifi yora manifoti ato iquina. Ascashu arusu fusti aton niaifo unupacunacamaran,”  
ishon yoiavo. <sup>16-17</sup>Ascatan nan Jesús icoínra huaa cushumisifo veinte cuatro nocofunufo aton tsaotifoqui Dios icano tsaoafu. Ascashon fuoshonpacufoantan Upa Dios yoiavo isca huaquin,

“iAicho! Min nocon Ifo Dios min ahuamamishti huatiyo. Min curushhuunshon natian nantifi

manifoti min ato iquina. Ahuashta min oni huataima min iyopaonishaquin. Natianrifi min ipanaca.<sup>18</sup> Manifoti miqui sinamisifofia. Ascan natian mirifi min atoqui sinaquin min ato onaintimashqui. Nantianrifi mia tanamisifo min ato ahuara inansharashquin. Ascashori nan min tsain yoimisifori inansharafain mia icoiria huafoti nan min ato yoia cuseacoin amisifo inanfain ahuamafashion mia tanamisifo yafi niaifoan mia tanamisifori nanfo min ato inanshquin. Ascashon nantifi mia tanamisifo min ato inansharashquin mifu ipanonfo. Nantianri nan yora chaca huamisifori min ato onaintimashqui omitsiscapanacafó muran fotanfonfo,”

ishon yoia.

<sup>19</sup> Ascaino Diosin icaria Dios fu tsainti pushu fupucuaiton un oian. Nan Upa Diosin Israelifo yononi cuscan cunuacua cashon muran nanuaiton un oiainno canan facaicain nai turuica curushcoin icain mai nayanaiyaicain unu matsi tocorofo nai murannoashu mai ano pacui.

**Ainfon yafi famanhuan cuscara nai muranno Juanpan oinni**

**12** <sup>1</sup> Ascatan afanan uhuun namapan cuscaramon ua oinmana cuscan un mato tapimai. Nai murannoahuara tsoan oinyomisima cuscara un oian. Ainfoan ahuun saya chashacoin fari ointsa sahuuashu oshu camaqui paia ointsa. Ascatan doce fishi ointsafo ahuun maitihuun nua maia.  
<sup>2</sup> Nan ainfoan facu nanuashu man facu isinhuaino fasi fiisica.

<sup>3</sup> Ascatan nantianri nai murannoahuara tsoan oinyomisima cuscara un

oian. Nan Satanás yoshin chaca famanhuan cuscaraflashu oshicoin siete mapoya. Ascashon ahuun mapotifi niaifoan maiti maia. Ascatarifi mucu rafuti mashoya.<sup>4</sup> Ahuun ina sharafoaino atirifi fishi nai murannoashu mai ano pacua. Nanscarifiai Upa Diosin ahuun oinmatifo Satanás atirifi ato chaca huamani. Ascan ahuunoashu a cuscara yoshin chacafori ato imano nai muranshon Upa Diosin ato potafain mai ano ato nichini. Ascacun nannoshon nan Satanás famanhuan cuscaramon ainfo facu caiyainton cushua caintanaiton facu piishquin.<sup>5</sup> Ascashu furonanfacu caian. Nan facu nantifi manifotifain aton niaifo iqui. Ato cushusharashquin tsoashta yoitima inonfoma. Ascacun Upa Diosin icano ahuun facu ihuiriscatana afu niaifo inon.<sup>6</sup> Ascacun tsoan istaipama ano Diosin nan ainfo ati shara huashoni nanno ichonon. Nan mai ano fari rafu non fusti nushmancayan Upa Diosin nan ainfo cushusharafain pimasharani ahuuscanonma.

<sup>7</sup> Ascashori un mato tapimai ahuuscashomain nai muranshon nan yoshin chaca Satanás famanhuan ointsatón nocon Ifo Diosin finonpaiquin. Ascaiton Upa Diosin ahuun oinmati afu nai muran icafoan aton niaifo ahuun anu Miguel Diosin nichian. Satanás yafi yoshin chacafo Miguel ahuun oinmatifoya potanapainifo.<sup>8</sup> Ascafia Miguel futan Diospan oinmatifoan Satanás yafi ahuun yoshin chacafo ato finoncoinnifo. Ascashon nai arishon ato potapacuni afanan ari inonfoma.<sup>9</sup> Ascacun Miguel futan Diospan oinmatifoan ato nai muranshon mai ano potani. Nan famanhuan cuscara nan rononhuan shuni ahuun anu futsa Satanás nantifi manifotifain ato parafafainmisi.

<sup>10</sup> Ascatan oi uhuapa nai murannoahuara tsoan oinyomisima cuscara un

“Nan yoshin chaca Satanás nai muranshon man potafo. Nanton Dios ano cashon Jesús icoínra huafihuunoa tsain chaca yoi isca huaquin, ‘Mia icoínra huaoan fasi chaca huaran,’ ishon nocohuunoa shafatifi yafi yamutifiri yoifafaini. ¡Aicho! Ascafia natian Upa Diosin Satanás ahun curush man shatumacoinna afanan nan yoshin chaca nocon ifo inonma. Ascan ahun Facu nan nocon Numamisi Cristo afinecoin nantifi man ato isma ato iquishquin. Ascacucaí afanan Satanás Jesús icoínra huaoan aton ifo itiroma.

<sup>11</sup> Ascacun nocon yorafoan fasi icoínra huacoínshon yoimisifo isca huaquin, ‘Nocon Ifo Jesús Diospan facu nan chashoan facu cuscara nocohuunoashu nani nocon chaca soashoshquin,’ ishon yoifoanfafaincani. Ascashon Jesuhuunoa yoimisifo cuscan yafi ahun imi focain ato nashonihuunshon Satanás finoncointirofo afanan ato alhuusca huanonma. Ascacun yoitirofo isca huaquin, ‘Nan icoínra huamafoan noco rututirofia noncái ratuyamacai nocon Ifo Jesús potapacunacamaran,’ ishon nan icoínra huaoan yomisifo.

<sup>12</sup> Ascacufin man nai muran Dios ari icafo unimacahuun. Nan icoínra huaoan Jesuhuunshon man Satanás finoncoian. Ascashon Satanás nai muranshon man potafo. Ascafia nan mai ano icafoqui man nooco. ¡Ohuashta! Mai anoafó yafi unuhuan anoafori fasi omitsiscashcani. Satanás man tapia ahuitianran Jesús mai ano nocoriscashon omitsiscapanacafó muran a potashquin tsoa afanan

chaca huamanonma. Nanscara man tapiashu Satanás fasi sinacoinquin nantifi manifoti ato omitsiscamapai Jesús fu ipanonfomaran,”

ishon yoia.

<sup>13</sup> Ascatan a mai ano potafo man tapishon Satanás shinanquin isca huaa, —Nan ainfo furonanfacu caian un mufoicai aqui nocoshon omitsiscahuashquin, —ishon shinan.

<sup>14</sup> Ascacun Diosin nan ainfo tutumanhuanun pui chainipa cuscara inan ahun noyacaini cashu tsoan istaipama ano iyonon. Nannoshon Upa Diosin fari rafu non fusti nushmancayan cushusharayoa nan yoshin chaca rononhuan cuscаратон ahuuasca huanonma. <sup>15</sup> Ascano nan rononhuan ahun ashfapan unuhuan nachian fai tahuain cuscara ainfoqui nocoshon asanon. <sup>16</sup> Ascafia Upa Diosin yonoa nan ainfoqui faitahuan nocotama mai muran man foa ainfon asanonma. <sup>17</sup> Ascacufin Satanás famanhuan cuscara sinatapacoin ainfo yafi ahun funafo rutupai caa. Ascashon nan Diosin yonoa cuscan amisifo yafi Jesús noco Ifoan noco nashoniran huamisifo nanfofin ainfoan ahun facufo. Nanfo Satanás ato cuyopai caa. <sup>18</sup> Ascan unuhuan cusumunri nan famanhuan cuscara Satanás nishon ato manai.

**Unuhuan murannoashu yoina cuscara  
musucoin cainacahuana**

**13** <sup>1</sup> Ascan uhuun namapan ointsa ua oinmana cuscan afanan un mato tapimai. Unuhuan cusumun un niano yoina cuscara musucoin unuhuan murannoashu cainacahuanaiton un oian. Ahuun caya fustifiashu siete mapoya. Ascan ahuun mashori diez ya. Nan ahuun mashoti niaifoan maiti maia. Ascashon Upa Diosiqui tsain chaca huaquin ahuun fumananfoqui cunu

futsa cuscarafo nutan. <sup>2</sup>Nan yoina cuscaraaron ahuun caya masharo leopardo ointsa. Ahuun tau rafu oso masharona ointsa. Ascan ahuun ashfa masharo leonna ointsa. Ascan nan Satanás yonoa ahuun curushhuunshon nan yoina pofu cuscaraaton tsoan atiroma cuscan nanto huatiro. Ascashu ahuun yorafo ato ifo itiro ato yononon.

<sup>3</sup>Ascaiton nantifi yorafo manifoti anoafaoan oianfo ahuun mapo futsa amaqinoa rutuafu shinantsafishu man caya. Ascacun yoiafo isca huaquin, —¡Aira! ¡Oincapon! Ahuucashutsi ahuun mapo futsa man rutuoinfiafo natian afanan man niaran, —icashu yoinanfo. Yoiquin asca huacatan nanton yoia cuscacoin tanafo. <sup>4</sup>Ascan tanacashon yoiafo, —¡Aicho! Satanás ahuun shinanhuanshon na yoina pofu cuscaraaton tsoa futsan atiroma cuscan huatiro. Ascacun ahuunoashu nantifi yorafo yonotiro. Ascan Satanás nocon Ifocoin. Noco yoipaiyai cuscan non nicacointiro. Nan yoina pofu cuscaraari nocon Ifo. Tsoancai a finontiroma. Tsoa futsacai na yoina pofu cuscarama. Tsoancai a rututirofomaran, —ishon yoiafo.

<sup>5</sup>Ascashu nan yoina pofu cuscara fasi cacapaimisi ica. —Tsoa futsacai ua cuscaramaran, —ishon yoia. Nantori Diosiqui fasi tsain chaca huamisi. Ascashon Satanás yonoa fari rafu non fusti nushmancayan nan yoina pofu cuscaraaton nantifi yorafo ato iquina. <sup>6</sup>Nantianri Dios roafain ahuunoa tsain chaca yoifain nan icanoahuunoa tsain chaca huafain nan icanoafquiri tsain chaca huai. <sup>7</sup>Ascan Satanashuunshon Jesús icoira huafu mai ano icafo ato rutumashquin. Ahuunshon nantifi manifoti yafi nantifi tsain futsa futsatapafo yoimisifoan aton niaifocoin inon.

<sup>8</sup>Ascan nanfoan nantififain nan yoina pofu cuscara noishcani. Ascashon yoiquin isca huashcani, —Minfin nocon Diosiquin, —huashquicani. Ascaifoancai nocon Ifo Jesús aton anu ahuun libro muran cunuima afu nipanfonfo. Mai oni huataima Jesús nantifi icoira huanonpacoaifoan ato anufo ahuun libro muran iquisi cunuyoni afu ipanfonfo. Ascashu nan chashoanun facu cuscarausu noco nashoni noco nimapacushquin.

<sup>9</sup>“Man pachoyaquin ua nicacahuun.

<sup>10</sup>Nan yoina pofu cuscaraaton Jesús icoira huamisi futsafo cunu muran iquimapaiquin iquimashquin. Ascan ato rutupaiquiri ato rutushquin.”

Ascafia uhuun yoramishtichin shinanchacayamacahuun. Nan non Jesús icoira huafoti non omitsiscafiaquin non tunucoinshquin nocon Ifo Jesús cachiquiri huashquima.

<sup>11</sup>Ascatacun un afanan oian yoina pofu futsa cuscara mai murannoashu caiyainton un oian. Chashoan facu cuscaraifiashu masho rafuya. Nan Satanás famanhuan cuscaraaton ahuun tsain fasi pofucoin. Nanscarifiai nan yoina futsa cuscaraaton ahuun tsain pofucoinri. <sup>12</sup>Nan yoina pofu unuhuan murannoashu cain tauaton ahuamamishti huafain yorafoti iquina cuscan nan yoina pofu futsari nanscara huaa. Ascashon nantifi maifoti anoa ato yonoa isca huaquin, —Nan yoina cuscara mapo ruranfo man naacoinfiafu afanan man nia. Nancai noco iforan nocon Diosiran huacahuun, —ishon ato yonoshquin. <sup>13</sup>Ascashon ahuamamishti tsoa atiroma cuscan ato isma. Yorafoan ato ointaifiri nai murannoia chii pacumana.

<sup>14</sup>Satanashuunshon nanscara huariaquin yorafo man paran Diosiran huanonfo. Ascashon ato yonoa, —Nan yoina pofu

cuscara nopu cunopaton man rutufiafo afanan nimisi nan ointsa uhuapacoin ramihuacahuun, —ishon ato yonoa.

<sup>15</sup> Ascacashon ato yonocun Satanashuunshon man ramihuafu nan yoina pofu cuscara ointsa man shacaimana. Ascano shacaitan nan ramihuaoan tsaincochin yoia isca huaquin, —Ua ifoacahuun. Min Diosiran ua huacahuun. Tsoan ua noicasmaquin nannori yoicasmaiton nan rutucahuun, —ishon ato yonoa.

<sup>16</sup> Ascatan nan yoina pofu cuscara futsa nan mai murannoashu oaton yoiqui isca huaa, —Maton mucu mumiori iyamarai mato fumananqui nan yoina pofu cuscara futsa unuhuan murannoashu oaton ahuun anu iyamarai ahuun numero nantifi sellapan ato nutacahuun. Facufo nutafain iyoafofori nutafain mafo ichapaya nutafain ahuuomafo nutafain oinmatifomari nutafain oinmatiffo nutacahuun. Ascan tsoashta finonmayamacahuun. Nantifi nan yoina pofu futsan ahuun anu sellapan nutacahuun matoquin, —ishon ato yonoa. <sup>17</sup> Ascan tsoa sellapan anu nutama atocai ahuara fipaifiaquicai fitiroma. Ascashuri ahuara inan mitsatiroma ahuun rafanan tushu yafi sahuuti ahuara futsa yopai cuscan fishquin.

<sup>18</sup> Ascacun shinansharacahuun. Ratoranfoan Diosihuunshon shinansharaqui tapitirofo nan yoina pofu cuscаратon ahuun numero tapifain ahuun anurifi tapitiro. Ascan nan yoina pofu ointsaflashu nocofunucoin. Ahuun numero 666.

Jesús icoinra huafuan 144,000  
fanainshocani

**14** <sup>1</sup> Ascatan uhuun namapan ointsa ua oinmana cuscan afanan mato tapimai. Chashoan facu cuscara nan

Jesús machi ahuun anu Sión ano nia un oian. Nanno 144,000 ahuun yorafo afu nia. Ahuun anu yafi Apa Diosin ahuun anuri aton fumananqui cunua.

<sup>2</sup> Nantianri un nai murannoia oi uhuapacoin nica. Unuhuan ponoain nicatsa nicafain turuica achacoin nicatsa. Nan oi uhuapa un nica yora ichapa fanaincanti manuti ichapari manuafu. Nan manuti ahuun anu arpa guitarra cuscara.

<sup>3</sup> Fanainti funa tsoan nicayomisima Upa Diosin ahuun ointaifi fanainshoafu. Ascaifoanno nannori nan rafu non rafuri Diosin onihuani yafi Jesús icoinra huafoti cushumisifo veinte cuatrofoanri arifi nicafo. Nan 144,000 Jesús fu machi ano niafo. Ascan nanfoansi nan fanainti funa tapianfo. Jesús ato nashoni aton chaca soashoshquin Satanás afanan aton Ifo itamarocon nan aton ifocoin inon. Tsoa futsacai nan fanainti funapan atofu fanaintiroma.

<sup>4</sup> Nan 144,000 yorafoan nocon Ifo Jesús nan chashoan facu cuscara tanacoinmisifo. Chaca shinantamarocon Jesushuunoa shinanfafaimisifo. Afin ato numani ato nashonishaquin Apa Diosin yorafo non ahuun yorafori inon. Ato catoan ahuun yorafo icaino ato yoia cuscan anonfo. Nanfoancaiyainfoqui chaca huamisima. Jesús caiquiri afu foanfafaimisifo. <sup>5</sup>—Nanfoan chani yoiaran, —ishoncái tsoan atohuunoa yotiroma. Jesushuunoashu isharamisifo.

Diospan Furun yafi ahuun oinmati mucu fustiti non mucu foshea fusti a fu nai muran imisiton yoiafo cuscan

<sup>6</sup> Ascatan un oian Diospan oinmati futsan afu nai muran ica fasi cuyacoin noyaino nantifi yorafo maifoti anoafu tsain shara ato yoinon. Caifoti yoifain shoco futsafoti yoifain nantifi tsain futsa

futsatapafo yoimisifoti yoifain manifotiri ato tsain shara yoinon. Upa Diospan tsain nipanacahuunoa ato yoia.  
<sup>7</sup>Oi ashcafinin ato yoia isca huaquin, —Diosquiri shinancahuun. Mato yonoa cuscan man ayamashu aqui ratucoincahuun. Nicacoinsharacahuun. “Min sharacoin min ahuamamishti min atiroran,” huacahuun. Natian Diosin nantifi chacamisifo onaintimai. Nanton nai onihuafain mai onihuafain unuhuan saoya onihuafain uno tsosi sharari onihuani. Ascan a noicahuun. A yoihhuu isca huaquin, “Min sharacoin min ahuamamishti atiro. Min nocon Ifon Dios shararan,” huacahuun, —ato huaa.

<sup>8</sup>Ascatan Diospan oinmati futsan afu nai muran ica ahuun tsain anaitishon futsan nocotoshishon isca huaquin yoia, —Nan pushurasi uhuapa ahuun anu Babilonia. Yorahuanrasa nan pushurasi uhuapa ano ica. Nan yorafoan fasi chaca huamisi. Nanfoan chaca huamisi cuscan manifotiri chaca huama. Asca huaifoan Upa Diosin ato onaintimai afanan ipanonfoma. ¡Aichofain! Diosin ato onaintima afanan pushurasi Babilonia yamairan, —ishon Diosin oinmatinin nai muran icaton yoia.

<sup>9-11</sup>Asca huatan afanan Diosin oinmati futsari nai muran icaton nocotoshishon oi ashcafinin yoia isca huaquin, —Tsoan na yoina pofu cuscara yafi ahuuna ointsa ramihua nicacoainno yoimisi isca, “Nan uhuun Dioscoinran,” ishon anori yoiquin aton mucus iyamarai aton fumananqui na yoina pofu cuscara ahuun anu cunua Upa Diosin atoqui sinacoinsquin. Naafaoanno Diosin ato fasi curushcay onaintimacoinsquin. Chi muran ato potafiacai cuyonacama. Jesús nan chashoan facu cuscara yafi ahuun oinmativo afu nai muran icafo aton ointaifi ato omitsiscapanacafu muran potashquin. Isin muuqui

unupacunacafoma. Tsoan ato numatiroma. Nan yoina pofu cuscara yafi ahuuna ointsa ramihua ifoafu ahuun anu aton mucus iyamarai fumananqui cunua. Ascacun shafatifi yafi yamatishonri omitsiscapacoinshcani. Tsoan tunupacunacafomaran, —ishon Upa Diosin ahuun oinmati nai murannoaton yoia.

<sup>12</sup>Ascancunfin uhuun yoramishti maton ointi fupuima sharacahuun. Omitsiscafiaquin tunucahuun. Diosin nocu yononi cuscan acahuun. Nocon Ifo Jesús cachiquiri huayamacahuun.

<sup>13</sup>Ascatan un nica oí nai muranshon ua yoiaiton, —Un mia yoiái cuscan cunuhuu. Ratoranfo nocon Ifo Jesushuunoashu nai unimacoinshciran, —ishon ua yoia. —Ainfain. Iconfinquín. Naacanashu afanan omitsiscatirofoma. Upa Diosin ato ama cuscan accoinnafo. Nantianri unimacoinshciani. Nanfoan futsafo shara huashomisi cuscan Diosin nanfo ointiaquimamisima. Ascan Upaqui noocoifoan ato inansharashquinran, —ishon Diospan Yoshin Sharanun yoia.

<sup>14</sup>Ascatan uhuun namapan ointsa oian cuscan afanan mato yoinon. Un oian nai coin oshopa camaqui nan Diosin catoan Jesús ointsa un oian. Niaifon maiti orocoin maifain nopus ushtia cunocoin tsoma. <sup>15</sup>Ascan ahuun oinmati futsan afu nai muran ica Dios icanashu caa nocon Ifo yoishquin. —Natian man ica. Nan maifoti ano man fanafo oshian. Natian chituantian. Ascan min nopus ushtia tsomatán tashtushon ichahuahuu, —huaa. Nannori yoifiaquin fanacoinhuunoa yoiama. Diospan yorafohuunoa yoicoian isca huaquin, —Natian nantifi Jesús icoira huafu ihuihuu Upa Dios ican ichananshu afu ipanacaforan, —ishon yoicoian. <sup>16</sup>Asca

huatan nan nai coin camaqui tsaoshon ahuun nopus curushcai fucoa. Diosin mai anoafu tashtua cuscan huaquin aton icha huashquin. Nopucointhuunoacai yoiama ahuun tsainhuunoa yoia. Afin yoiatian ahuun yorafo ichanan huai.

<sup>17</sup>Ascatan un oian Diosin oinmati futsari afu nai muran icanoa caa. Arifi nopus ushtia cunocoin tsoma. <sup>18</sup>Ascatan afanan Diosin oinmati futsari Dios cufiti anoashu caa. Nanton Diosin yonoa cuscan chihuunshon yorafo onaintimati. A oinmati nopus ushtia cunocoin tsomashon oi ashcafinin yoia, —Nan fimi ahuun anu uva nantifi oshiancoin. Ascan mushtushon icha huahuu, —ishon yoia. Nanscarifiai Upa Diosin ahuun oinmatihuunshon a nicacasmamisifo ichanan huashquin.

<sup>19</sup>Asca huatan nan oinmati ahuun nopus ushtia cunocoin tsomashon uvatifin shatushon prensa muran pota ahuun unu fonon. Nanscarifiai Diospan oinmatifo afu nai muran icaton Diosin tsain nicacasmamisifo ichanan huai. Ascan Diosin atoqui sinacoin ato onaintimai. <sup>20</sup>Diosin icanoshon ato onaintimanama. Futsafoan ato rutushcapi aton imi ichapa foshquin. Ascaran tsoan oinyomisima. Aton imi noacoin caballo fasi tusanancoian. Ahuun chai trescientos kilometro.

Upa Diosin ahuun oinmati siete a fu nai muran imisifo afanan ato yonoa mai anoafu onaintimanon

**15** <sup>1</sup>Ascatan uhuun namapan ointsa un ahuara futsan un oian. Tsoan oinyomisima cuscara nai muranno a un oian. Oin uhuun nomuran, —iUru! —un ica. Natian un oian cuscan mato tapimanon. Nicacahuun. Diosin yora yoitimashunifoqui fasi sinaiquin. Ascacun ahuun oinmati siete afu icafo ato yonoa nantifi mai anoafu onaintimai

omitsiscanonfo. Nan ahuun unutaqui Upa Diosin ato onaintimai. Afananciai atoqui sinaquin ato onaintimashquima.

<sup>2</sup>Un oian unuhuan pusiquima raca unuya chi osian ointsa. Nanno yorahuanrasi nia. Na yorafoanciai yoina pofu cuscara yafi ahuuna ointsa ramihua ahuun numero atoqui cunu nutanmisima. Nanfoan ato shuhuincoianfo. Nan unuhuan pusiquima raca unuya chi osian ointsa fumancayan maniafo. Upa Diosin atoti manuti inanpacua. Nan manuti guitarra cuscara ahuun anu arpa. <sup>3</sup>Aton arpa tsomacashon Diospan oinmati Moisés yafi Jesús nan chashoanun facu cahuanshara cuscara fanainmisi cuscan atorifi nannori fanaincani isca huaquin,

“Ifon, mincaifin Diosiquin.

Min ahuamamishti atiro.

Min amisi cuscan sharacoin.

Tsoan futsacai atiroma.

Min manifoti nantifi aton niaifocoin ipanaca.

Min shinanmisi cuscan cayacafi iconcoin.

<sup>4</sup>Ifon, nantifafain miqui musucaquin mia nicasharapainonfo.

Min ahuamamishti tsoan

oinyomisima min atiroquin.

Nantifi yorafoti anori yoipacunonfo.

Mirus fusticai min chaca huamisima.

Nantifi manfoti miqui funonfo.

Min shara fustisi huamisi.

Nantifafain oinquin isca huashquin, ‘Min sharacoin. Min nocon Ifocoirran,’”

ishon mia yoishcana.

<sup>5</sup>Ascatan afanan un nai muran Diosin ican oian. Ua fupushona Diosin icanocoin un oinon. <sup>6</sup>Dios ica murannoashu ahuun nai oinmati siete nantifi chifi ichananfo. Nanfoan mai

anoaf o naintimai omitsiscanonfo. Sahuuti oshopa chainipa chashai sahuufain oro cuscara nonushumua sahuuaf. <sup>7</sup>Nan rafu non rafuri Diosin onihua futsan Diosin oinmati afu nai muran icafo siete atoti oro tutso inancua. Diosin nan nipa nacat onicoinra huafoma mai anoaf sinacoinquin nan cuchanfo muran ahuara chacacoin fospihuamua atoqui ocano omitsiscashcani.

<sup>8</sup>Ascatan nantian Diosin chashaiton ahuamamishti atiro cuscan ato ismaining nan ica muran coinmahuan fospia nashfiai. Ascan mai ano nan Dios nicacasmamisifo Diosin oinmatiffo afu icafoan ato onaintimai omitsiscanonfo anaitiataimanocai tsoa Dios ican oquiyotirofoma.

**A nicayosma shunifo Diosin ato  
onaintimai omitsiscapanonfo**

**16** <sup>1</sup>Ascatan Dios icaricoian oi ashcafin un nica. Diosin oinmatiffo nan siete afu nai muran icafo ato yoia isca huaquin, —Diosin a nicacasmamisifo mai ano icafo atoqui sinaquin nan tutsof ahuara chacaf fospihuamua atoqui ocacahuun, —ishon ato yonoa.

<sup>2</sup>Nicacashon Diosin oinmati futsan tauhuaqui ahuun tutso nai muranshun mai ano ocano. Nan yoina popu cuscara ahuun anu aton mucu iyamarai aton fumananqui cunuaf yafi afin ramihuamua ointsa ifoanfonu nanfo aton yoratisho coo suyacoin fuchiriscata isincoin tunutirofoma.

<sup>3</sup>Ascatan afanan Diosin oinmati futsan ahuun tutso nai muranshun unuhuan muran ocano. Ocaino unuhuan fianananriscatana nocofunu rutuano ahuun imi foa ointsa. Ascanofin nantifi nan unuhuan murannoashu nai futsuaf.

<sup>4</sup>Ascatan afanan Diosin oinmati futsan ahuun tutso nai muranshun unufoti yafi mai murannoashu unu afaifotiqui oca. Ocano unufoti yafi mai murannoashu unu afaifotiri fianananriscatana imi ica.

<sup>5-6</sup>Nantianri oinmati futsan Dios fu tsaincaiton un nica. Nan unu cushima isiton isca huaquin yoia,

“Upa Diosin tsoa min oni huataima min iyopaoni. Min ipaoni cuscan nati anri min nipa naca. Min shara fustisi imisi. Iaicho! Nantianri mia nicacasmamisifo min ato onaintimai cuscan iconco. Aton chaca shatucanashu min Furun Jesús Ifocoianfo non min tsain aton yoimisifori nan ico inmaran huafoan ato rutuaf. Ascacu fin min ico inra huafoma namai cusca fin iconquin. Min yorafo fasi omitsiscamamisifo ascan min nan ico inmaran huafo onaintimai omitsiscanonfo. Min cayacafi iconco ato onaintimar,”

ishon Diospan oinmatin yoia.

<sup>7</sup>Asca huashon Dios ican o nai muran nan cufiti ato fustishosi Upa Diosin cufinmisifo anoa un futsanfo nica yoiquin isca huafoan,

—Nocon Ifon Diosin, min nai oinmati yoia cuscan iconco. Mia nicayosma shunifo min ato icon cayacafi ato onaintimairan,

—ishon yoiafo.

<sup>8</sup>Ascatan Diospan oinmati afu ica futsan Dios icarishon ahuun tutso murannoah ahuara chaca fari camaqui ocashquin. Ocano farihuunoashu yorafo coa. <sup>9</sup>Farin fasi shanacoinquin yorafo coa. Coaino omitsisco. Man tapiamisifo Diosin ato onaintimai aton chaca shatufoma. Dios ifo antamarocon. —Diosin noco chaca huai. Ahuun cuscaramain Diosquin. Chacacoinran,

—ishon yoiafo. —Diosifin sharaquin. Nantofin ahuamamishti huatiroquin, —ishoncái tsoan anori yoipaicanima.

<sup>10</sup>Ascatan Diosin oinmati futsan Dios icarishon ahuun tutso murannoá nan yoina pofu cuscara chacacoin yafi afu icafo ato camaqui oca. Ocano nan yoina pofu cuscara chacacoin ifoafó icano faquishcoin ica. Ascan nantififain isincoin muafó tunutiroma. —Aripun, —iriafo. <sup>11</sup>—Diosin nocoasca huaa. Ascan nocon yoratishon coo suyacoin non isin tunutiroma. Nan nai murannoá Dios chacacoinran, —ishon yoifiashu aton chaca shatuafoma.

<sup>12</sup>Ascatan Diosin oinmati futsan nai muranshon ahuun tutso murannoá unu uhuapa ahuun anu Eufrates amuran oca. Ocano nan Eufrates nutsoriscatana man mutocaina. Nan niaifo rafu non fusti fari oaiquirinoashu fucani. Ascan Eufrates nutsocoian aton ranushumuafó ya pocufaitirofo. <sup>13</sup>Ascano un yoshin fasi chacafo rafu non fusti fushco ointsafo un oian. Futsan famanhuan ointsa nan Satanás ahuun ashfan murannoashu caincaina futsan nan yoina pofu cuscara ahuun ashfan murannoashu caincaina futsan nan fuparapaimisiton, —Unfin Diosin tsain mato yoimisiran, —ifiashu chanimisi yoshin chaca ahuun ashfan murannoashu caincaina. <sup>14</sup>Nan rafu non fusti fushco ointsa yoshin chacafoan ahua tsoan oinyomisima cuscara ahuamamishti yorafo ismafo. Nantifi niaifo manifoti ano focani ato ichanan huamai nocon Ifo Jesús ahuun yorafo rutunonfo. Nantianri nocon Diosin ahuamamishti amisiton ahuun yono ismashquin.

<sup>15</sup>Asca huaifoan nantianri nocon Ifo Jesús noco yoipaiyai cuscan un maton yoinon. Isca huaquin yoa, —Ua nicacahuun. Yomutson tsoan tapimaima pushu muran iquinon. Samamashta

pushu muran iquiriscatiro ahuara onushquin. Nanscarifiai un tsoa tapimaima nan un matoqui nocoriscaitian. Un matoqui samamashta nocoriscashquin. Tsoan itisharacacaini ua tanasharashon manasharacoian fasi unimashquin. Ascan tsoan ascatama itisharayamaino un matoqui nocoriscaitian nantifi yorafoan ointirofo tsoan ua tanasharama. Ascashu fasi rafipaitiroran, —ishon yoa.

<sup>16</sup>Nannori nocon Ifon Jesús yoifiashu nan rafu non fusti yoshin chacafoan nantifi niaifo maifoti anoafó ichanan huaa Diospan yorafo rutupaiquin. Ato ichanan huamai nan mai ahuun anu Israelifo tsainman Armagedón.

<sup>17</sup>Ascatan Diospan oinmati futsan ahuun tutso nai muranshon oca. Asca huatan Diosin icarishon Upa Diosin fasi oi ashcafín yoa, —Mun aca. Natian man anaitiaran, —ishon yoa. <sup>18</sup>Ascatan fasi curushcoin canan pishiiriai icain ahuarao achacoinfo yafi fasi nai turuicacoin icain mai nayanaiyaiqui curushcoin. Ascacai tsoan mumisima. Nocofunu onihuauquin tau huanitian natianri mai nayanaiyaiqui ascaitocai tsoan muyomisima.

<sup>19</sup>Ascan nan pushurasi uhuapa ahuun anu Babilonia ano nayanaiyacaino mainhuan nantiocoin rafu non fusti toshamanhuan cainni. Maifoti anori aton pushurasifo nan mai nayanaiyaiquin maocomua. Diosin na pushurasi Babilonia anoafó chaca huamisifo cuscan ointiaquimamisima. Ascan atoqui fasi sinamanhuanquin ato onaintimacoin omitsiscanonfo.

<sup>20</sup>Nantianri unu potofotin yamariscatashquin ano icafori nai futsuafó. Nantifi machifotiri yamariscatashquin. <sup>21</sup>Nantianri unu matisi tocorofo uhuapacoin aton ihuu cincuenta kilos cuana nai murannoashu

yorafo fuchi pacua. Ascafia aton chaca shatutamarocon, —Diosin fasi chacacoin. Nan unu matsu tocoro uhuapacoinun noco omitsiscamairan, —ishon yoiafo.

**Mai futsan anoafó ainfon  
furoma cuscarafo**

**17** <sup>1</sup>Ascatan uhuun namapan ointsa ahuara ahuiscaran ariscashquiain cuscan afanan ua oinmayoa. Nan Diosin oinmati afu nai muran icafo siete tutso tsomacashon futsan ua yoia, —Nuri ohuu. Nan pushu ichaparasi unufo chaimashta anoafó fasi chacacoin. Ainfo furomacoin cuscarafo. Ascano Upa Diosin ato onaintimashquin. Oinyopon. Mia oinmanon. <sup>2</sup>Nantifi niaifofo maifotí atofu inanmitsamisifo. Ascan atohuunoashu afori fasi chacacoin icafo. Nan ainfo furomacoin cuscara icafo. Ascan Diosin ato onaintimashquiay cuscan mia ismaran, —ishon ua yoia.

<sup>3</sup>Asca huashon tsoan istaipama ano Diospan Yoshin Shara ua iyoa. Nannoá un oian nan ainfo yoina pofu cuscara oshicoin camaqui tsaoa. Nan yoina pofu ahuun yoratishon anu ichapa cunua. Nantifi nan anufo Diosqui tsain chaca cunua. Nan yoina pofu mapo siete ya. Masho mucu rafutiya. <sup>4</sup>Nan ainfo saya chainipa shonan yafi oshin sahuua. Oro facafacaitsa macush cuscara sharashtan yafi futsan ahuun anu perla oshopa nanri sharashtacoin sahuua. Tutso oro tsoma amuran ahuarafó chacacoin. Amuran nanua cuscan yorafo ahuara chacacoin futsa futsatapafo chaca huama. Aton nomuran shinanchamacana. Paunmafain chanimisi imafain aton ahuinma chotamisifo imafain aton funuma chotamamisifo imafain nancara chacafosi ato imapacumisi. <sup>5</sup>Ahuun

fumananqui cunua cuscan tsoan onanmisima. Isca huaquin cunua,  
**BABILONIA**

**NAN PUSHURASI ANOAFÓ  
TSOAN FUTSA ATO CUSCARAMA.  
AINFO FUROMACOIN CUSCARA  
YAFI NANTIFI MAI ANOA  
CHACAMISHTIFO**

ATON UHUA CUSCARARAN,  
ishon cunua.

<sup>6</sup>Nan ainfo furoma cuscara Jesús icoínra huafó ichapa nan Jesús uhuun Iforan huamisifo ato rutumamisi un oian. Un na ainfo oin un mustairia. Un yoia, —¡Ajaa! Ascaran ainfo chaca un oinyomisimaran, —ishon un yoia.

<sup>7</sup>Un ascaíno Diosin oinmati afu nai muran icatón ua yoia, —¿Ahúuscaín min mustairimun? Nan ainfo yafí nan yoina pofu camaqui cahuamisi nanton siete mapoya non masho mucu rafutiya tsoan atohuunoa tapimisima. Ascan natian un mia tapimai. <sup>8</sup>Nan yoina pofu min oian yoinacoimma. Afin niaifo uhuapa chacacoin. Nancacun Dios noicasmamisi. Niyopaoni. Natian niyamafiashu chipo nan yoshin chacafo icanoashu cainshquin. Nannoashu cainfiacun Upa Diosin omitsiscapanacafo muran potashquin afanan anoashu canacama huaquin. Tsoan Jesús icoínra huamacai aton anu ahuun libroqui cunuama afu ipanon. Nanfoan na niaifon yoina pofu cuscara oincashon mustairitan, “¡Aira! ¡Oincapón! Man nafiacanashu afanan oaran,” ishon yoishquicani.

<sup>9</sup>Ascan tsoan ahuun nomuran Diosihuunshon cayacafi shinantiro nanton un rama cunua cuscan tapitiro. Na yoina pofuhunoa mato yoinon ua nicasharacahuun. Ahuun mapo siete mapocointamarocon nanfohuunshon siete niaifohunoa noco tapimai. Nanfo icano siete machifo. Nannori nan ainfo

furoma cuscara ica.<sup>10</sup>Mucu fustiti nan niaifofo yamai. Man nanifo. Fusti natian nia. Futsan chipo iishquin. Chipo ifiashucuai chai ipashquima.<sup>11</sup>Nan yoina pofu cuscara oshicoin un mia yoia cuscan arifi yoinacointamarocon niaifon chaca futsan. Nan iyopaoni cuscan natiancai icama. Arifi nan siete fu ipaonifo. Chipo afanan ifiashu omitsiscapanacafu muran cai afanan anoashu canacama.

<sup>12</sup>Ascan nan masho mucu rafuti min oian mashocoinma. Nanfohunshon mucu rafuti niaifofo noco ismapai. Nanfo niaifofo icataifoma. Chipo mani futsanfo mucu rafuti aton niaifofo itirofo. Na yoina pofu cuscara fu niaifo iishquican. Ascanfiacai chai niaifo ipashquicanima. Samamashta unuriscashquin.<sup>13</sup>Ascafia unuataima nan siete niaifofo nannorisi shinanmisifo. Nan nocofunun yoina pofu cuscara apaiyai cuscan nannorisi shinancani. “Min noco yonopaiyai cuscan non atiroran,” ishon nan mucu rafuti niaifofoan nan nocofunu yoina pofu cuscara yoishquican. Afin nantifi niaifofo aton niaifocoin iishquin.

<sup>14</sup>Ascacashon nan nocofunun yoina pofu cuscara futan nan mucu rafuti niaifofoan nocon Ifo Jesús ahuun yorafoya noicasmacani. Jesús ahuun yorafo cunani ahuun tanamisifo inonfo. Ascashon ato catoan. Nanfo ahuussarafaino nocon Ifon cachiquiri huamisima. A tanacoimmisifo. Nan yoina pofu cuscara nan mucu rafuti niaifofo futan Jesús chashoan facu cahuan sharashta cuscara nan nocon Ifo yafi ahuun yorafo rutumapaishcani. Rutupaiyafaon atorocofin Jesús ato namashquin. Nantianri ahuun tanamisifo afu iishquican. Nocon Ifon nantifi niaifofo uhuapao non niaifofo patashariri aton niaifocoinshon ato

iquitiro. Nocon Ifon Jesús aton Ifocoinkhon ato iquitiro. Nantifi niaifofo yafi ifoafori manifoti anoafu ato iquitiro. Ascan tsoancai nocon Ifon Jesús shuhuintiroma ahuun tanamisifocai ato tsoan cuyotiroma, —ishon nan Diosin oinmati afu nai muran imisiton ua yoia.

<sup>15</sup>Ascan afanan ua yoia isca huaquin, —Min oian nan ainfo furomacoin cuscara unu fumancayan tsaoa. Nan unucai unucoinma. Nanhuunshon caifofo non yorafo non mani futsafo non tsain futsa futsatapayafo nan ainfo furonmacoin fu icafo noco ismapai.

<sup>16</sup>Nan mucu rafuti niaifofo yafi nan niaifo yoina pofu cuscara ainfo furoma cuscara noicasmacoinshcani. Nantifi ahuuna mani fiishquin afanan ahuuomacoin iishquin. Ascan afanan tsoacai na ainfo furoma cuscara fu ipaishquima. Ascaiton nan mucu rafuti niaifofo yafi nan niaifon yoina pofu cuscara noicasmacoincaquin omitsiscamacauqui chi muran ainfo furomacoin cuscara potashcani afanan inonma.<sup>17</sup>“Min noco yonopaiyai cuscan non atiroran,” ishon nan mucu rafuti niaifofoan niaifo yoina pofu cuscara yoiado. Ascafia Diosin nannorisi ato shinanmana afin apaiyai cuscan atohunshon anon. Ascatain Diosin yoiyomisi nan anon pacoui cuscan nanscara huashquin.<sup>18</sup>Na ainfo furomacoin cuscara ainfocointamarocon naanfin pushurasu uhuapacoin. Nanfoan manifoti aton niaifofo iquinaran, —ishon Diospan oinmatinin afu nai muran imisiton ua yoia.

Diosin oinmatinin afu nai muran ica yoia isca huaquin, —Natián Babilonia anoafu nai futsucani, —ishon yoia

**18** <sup>1</sup>Ascatain Diosin oinmati futsan nai murannoashu mai ano fotoaiton un oian. Upa Diosin yonoa

niaifo patashari nanton ahuamamishti atiro. Ahuunshon maifoti chashacoian.

<sup>2-3</sup>Oi ashcafinitin cunaquin isca huaa, “Babilonia ano icafoan fasi chaca huamisifo. Chaca fustisi shinanmisifo. Nocofunufoan aton ahuinma chotamisifo ainfofoan aton funumari chotamamisifo. Man amisifo cuscan caifo futsanfori atohuun caoafio. Ato chaca huamamisi Upa Dios tanatamarocon chaca fustisi tananonfo. Man chaca huamisifo cuscan caifo futsafori aton niaifofoan nanscarin huaquin chaca huamisifo. Nan Babilonia ano icafoan fasi mafo ichapaya. Ascan ahua yopacaquima mai futsa anoafio aton mafo inan ahuun rafanan pui fiishcaquin. Ascano futsafoanri mafo inanmitsacashon ahuun rafanan pui finonfo. Asca huacanashu Babiloniahuunoashu afori mafo ichapaya icafo. Asca huacaquin Upa Dios shinanmisifoma.”

“Ascacufin Upa Diosin nan Babilonia anoafio fasi onaintimai afanan tsoan ano inonma. Ato namaquin cuyoshquin. Afanan ano yora itamarocon yoshin chaca futsan futsantapafo tsain mutsama yoifafainaifo ano icaforan,”

ishon Upa Diosin oinmatinin nan afu nai muran icaton ua yoia.

<sup>4-8</sup>Yoiquin asca huatanaino nai murannoashu un oi futsan nica isca huacaquin, “Babilonia ano icafoan fasi chaca huamisi finacoianfo. Nan chaca huamisifo cuscan Upa Diosin ato oinshon ointiaquimanama. Ascashon ato onaintimacoinsquin, Upa Diosin, nan Babilonia anoafio futsafo chaca huamisifo cuscan

mimacoin huaquin ato onaintimahuu omitsiscanonfo. Man yoiafo isca huaquin, ‘Noncái Dios yopaima. Non ahuashta yopatiroma. Nonfin isharamisiquin. Nonfin ainfon niaifocois isharamisi cuscara. Noncái man funu amaqui naa ainfo funuoma cuscarama. Nanscara ainfo manoi omitsiscatiro. Noncái manotamarocon non isharapacuncaran,’ ishon cacapaimisifoan yoafo.”

“Ascan, Upa Diosin, ato fasi onaintimahuu omitsiscrai tununonfoma. Icoinra huaoan ua nicasharacahuun. Upa Diosin ato samamashta onaintimacoinsquin afanan isharatamarocon atirifi namafain omitsiscamafain aton tushu cuyomashquin fonainquin naanonfo. Tsoan atiroma cuscan Upa Diosin ahuamamishti huatiro. Nanton ato onaintimai ato cooai cooi futsunonfo. Ascano Upa Diosin mato yoi isca huaquin, ‘Uhuun yoramishtichin, Babilonia anoafio cuscara iyamacahuun. Ato fu rafuyamacahuun. Ato futan chaca huayamacahuun un ato onaintimai cuscan un matori onaintimanonma,’ ”

ishon Upa Diosin mato yoi.

“Ascan Babilonia coaino mai futsafoti aton niaifofoan oincani uaicaquin manoshcanni. Nanfoan Babiloniafo futan Upa Dios potacani chaca huanonfo. Babilonia anoafohuunshon mafo ichapafiafo. <sup>10</sup>Nanfo coaino oincani niaifofo fasi ratushquicani.

“¡Ohushta! Babiloniafo rato caifo futsanci mato cuscarama. Man tapicoinsharafiacun samamashta Upa Diosin mato onaintimai man coi futsunon. ¡Ai timafin!”

ishon ratucoincaquin niaifofoan yoishquicani.

<sup>11</sup>Nanscarifiai manifoti aton inanmitsamisifo uaishcani. —¡Ohuashta! Babilonia man coi cuyo. Natian tsoan futsacai nocon mafo non nocon ahuara futsafo fitiroma. <sup>12</sup>Nocon oro sharashtacoin fianmafain nocon torofo oshoshtacoin fianmafain nocon toquiriro faca facaitsa chico. fianmafain nocon toquiri futsan ahuun anu perla fianmafain nocon pano futsa futsatapafo fianmafain nocon ihui inin sharashtacoin futsa futsatapafo fianmafain toquiri curushcoin oshopa sharashtacoin ahuun anu marfilhuunshon ahuarao onihuafain ihui chico. inhuunshon ahuarao onihuafain cuno ahuun anu broncehuunshon ahuarao onihuafain cuno futsan ahuun anu fierohuunshon ahuarao onihuafain toquiri ahuun anu marmolhuunshon ahuarao onihua nanfo afanan fianmafain.

<sup>13</sup>Nocon pitiri ahuun anu canela non yochi non nan fimi ahuun anu uva ahuun unu non shuni non harina roroshta non trigori fianmafain inin shara aton anu incienso yafi futsan ahuun anu mirra non inin futsafori fianmafain nocon inafo nan moifo non chashoanfo non caballofo fianmafain taramutiya fianmafain nocon oinmatifori nocon afanan fiantirofoma.

<sup>14</sup> “¡Ohuashta! Babiloniafoan nan ahuarashta sharashtacoin futsa futsatapafo man fasi fuchipaimisifo afanan man fitiroma. Nantifi man aya cuscan man funocoian afanan man fipanacama. Man ahuara yopapaonima. Man acai afanan ascanacama. Nantifi matona man funoi cuyocoianran,” ishon nan inanmitsamisifoan yoishquicani. <sup>15</sup>Babiloniafo fasi

omitsiscai nan Babilonia anoaflo yamafashion aton mafo fimsiflo atohuunshon mai futsa inanmitsashon pui ichapa fimsiflo fasi ratucoinca. Fasi uaishcani manocaquin yoiquin isca huashcani,

<sup>16</sup> “¡Ohuashta! Rato futsafocai Babiloniafo cuscarama. Ahuun yorafo sahuuti sharashtacoin sahumisifo. Sahuuti shonan shara non oshin shara non oro toquiri faca facaitsa chico. non toquiri futsa ahuun anu perla sahuutihuun nua nascara sahuuaflo. <sup>17-19</sup>Fasi isharafiamisishacaquin samamashtacoin nantifi man funoaflo. Afanan aton pushurasi yamai. Man coi cuyoi futsua. ¡Ohuashta!”

ishon nan inanmitsamisifoan yoishquicani. Nanscarifiai nan shashohan ifofo non amuran fomisifo non shashohanun camisifo pui fiishquin afoanri fasi shinain. Babilonia coaiton chaicushon oincani manocani fasi uaicani.

“¡Ohuashta! Rato pushurasi futsanci Babilonia cuscarama. Nanno fustishon shashoan ifofoan pui ichapa fiafo. Ascanfiacanashu samamashtacoin nantifi man aya cuscan man funoaforan,” ishon shashoan yonomisifoan yoishquicani.

<sup>20</sup> “Ascafiaifoanno nantifi Upa Dios fu icanoafoan unimacahuun. Babiloniafoan Jesús icoinra huaflo man omitsiscamamisifo. Ascancufin Upa Diosin ato fasi onannitimana omitsiscapanacafo. Nantifi Jesús icoinra huaflo non Jesús fu rafumisifoan non Diosin tsain inon pacoui yoimisifoanri unimacahuun,” —ishon yoya. <sup>21</sup> Ascatan Upa Diosin ahuun oinmati afu nai muran icaton

futsan mutsisipacoin toquiri uhuapacoin finifoantan unuhuan muran potaquin yoia isca huaquin,

“Un na toquiri curushcai pota cuscan nanscarifia Upa Diosin nan pushurasi anoaflo Babilonia curushcai ato onaintimashqui coi munononfo. Cuyoriscatashquin afanan tsoan oinnacama.<sup>22</sup> Ascan afanan Babilonia ano manutifo nan shainti non manuti futsafori pusicanima. Tsoancai afanan ato nicanacama. Yonomisi afanan ano iyamacain afanan naniainfo nicayamafain<sup>23</sup> afanan lamparina ano otapacunacafoma. Nocofunun ainfo fiaino unimaifoan man nicamisi.”

“Ascan afanan tsoan ascaran nicapacunacama. Babilonia anoa inanmitsamisifoan fasi tapicoincani. Nanfoan fasi ichapa fiafo. Aton shointihuunshon manifoti paramisifoquin.<sup>24</sup> Babiloniafoan Diosin tsain yoimisifo non Jesús icoinra huaflo futsafori rutumamisifo. Manifoti anoa ato rutunifo,”

ishon Diospan nai oinmatinin yoia.

**19**<sup>1-2</sup> Ascata nai muran icafo ichapacoin aton oi un nica. Oi ashcafchin un ato nica isca huaquin, “Tsoan chaca huamisi Upa Diosin ato onaintimai. Iconquin ato onaintimai. iAicho! Nocon Ifon Diosin fasi sharacoin non yoipacunon. Nanton nocon chaca soashona non afu nipanon. Ahuunoa fusti non yoitiro isca huaquin, ‘Min nocon Ifocoin. Tsoa futsacai mia cuscarama. Mirus fusti min sharacoinmisiran,’ ishon nantifishon yoipacunonfo. Ahuun shinanhunshon ahuamamishti huatiro. Upan Diosin Babilonia

anoaflo atohuunoa isca huaquin yoia, ‘Nan Babilonia anoaflo ainfo furomacoin cuscarafo. Man chaca huamisifohun manifoti anoaflo ato chaca huama. Ascancufin ua Babiloniafoan fasi ua chaca huaflo. Uhuun yorafori man omitsiscamacani naanonfo. Ascan un ato omitsiscamacapacuncaran,’” ishon Upa Diosin yoia.<sup>3</sup> Afanan oi ashcafchin nai murannoafaoan yoia isca huaquin,

“iAicho! Nocon Ifon fasi sharacoin non yoisharapacunon. Chaca huamisifo iconquin ato onaintimai. Ato chii urumanhuan muran potai.

Nan chiicai nocapacunacamaran,” ishon yoiafo. <sup>4</sup> Ascanori Upa Diosin tsaoa ano nan Jesús icoinra huaflo aton cushumisifo nan veinte cuatro nocofunufo yafi nan Diosin onihuani rafu non rafuri anaman fuoshonpacufoantan isca huaquin yoiafo —iAicho! Nanscasi ipanon. Amen. Nocon Ifon Jesús fasi sharacoin, non yoipacunon —ishon yoiafo.

<sup>5</sup> Ascata Upa Dios tsaoa anoa un oi futsan nica isca huaquin,

“Upa Diosin oinmatifo non niaifoanri man Diosin mato yoia cuscan nicacoinmisi. Mariji Upa Diosihuunoa yoisharacahuun isca huaquin, ‘iAicho! Upa Diosin min fasi sharacoinran,’”

huacahuun.

**Jesús nan Diospan chashoan facu cahuanshara cuscara ahuun yorafo aqui ihuutiro afu fusi huanonfo**

<sup>6</sup> Ascata yorahuanrasi aton oi unuhuan ponoin achacoin cuscara yafi nai curushcain turuica nicatsa un nica yoiaifoan,

“Nocon Ifon Diosin tsoan atiroma cuscan ahuamamishti huatiro.

Nanfin nantififain nocon  
Niaifocoquin. Manifoti anoa noco  
iquinan. ¡Aicho! Nocon Ifon Diosin  
fasi sharacoin non yoipacunon.”

<sup>7-8</sup> “Nocofunun ainfo fiaino ainfo  
unimacoin itisharatiro ahuun funu  
fu fianain. Nanscarifiai nocon Ifo  
Jesús nan chashoan cahuanshara  
cuscara natian ahuun yorafo afu  
imapacui. Ascan ahuun yorafo man  
itisharafo afu ipashcaquin. Ainfoan  
ahuun funu unimamai nashitiro.  
Nashishon saya funa sharashtacoin  
patsashon sahuutiro afu  
fiananshquin. Nanscarifiai ahuun  
yorafoan itisharashon Upa Diosin  
aton chaca soashonon Jesús fu  
ipasharanonfo. Ascacun non  
unimanon. Tsoa futsancai mia  
cuscara sharamaran non nocon Ifo  
huanol,”

ishon yoiafo. Diospan yorafoan  
Jesushunshon futsafo shara huamisi.  
Ascan Diosin ato sahuuti sharashtacoin  
sahuumana Jesús fu ipasharanonfo.

<sup>9</sup> Ascatan Diospan oinmati nan afu ica  
ua yoia, —Un mia yoiai cuscan  
cunuuhu isca huaquin, “Uhuun Facun  
Jesús chashoan facu cuscara natian  
nantifi ahuun yorafo ichanain afu  
ipashcaquin. Ascan ohuu. Uhuun Facu  
ahuun yorafo pimai minrifi ato futan  
pitiro afu ipashquin,” ishon Upa Diosin  
nannori yoi fasi unimatiro. Nannori Upa  
Diosin ahuun tsain. Ahuun tsain man  
icoinra huatiroran, —ishon ua yoia.

<sup>10</sup> Ua yoiaino un anaman fuopacua,  
—Min sharacoinran, —ishon yoishquin.  
Ascaflashon ua yoia, —Asca  
huayamahuu. Ua anori yoiyamahuu.  
Unrifi nan mi futan Jesús icoinra huafo  
cuscarari. Jesús mato yoia cuscan man  
cachiquiri huamisima. Un matofu ahuun  
oinmatiri. Nan fusti non fuoshopacutiro  
yoishquin, “Min fasi shara. Min uhuun

Iforan,” ishon min nan fusti yoitiro.  
Diospan tsain yoimisifoan yoafo cuscan  
unrifi un mia yoia nanscasi huaquin non  
Jesushuunoa non yoinon, —ua huua.

**Cristo afanan mai ano  
oshquiai cuscan yoia**

<sup>11</sup> Ascatan uhuun namapan ointsa ua  
oinmana cuscan afanan un mato  
tapimai man tapinon. Upa Diosin nai  
muran icanoa un oian. Fupoti fupumua  
pushu muran non ointiro. Nanscara Upa  
Diosin icari un cayacafi oian. Nanno  
caballo oshopa un oian. Nan caballo  
camaqui tsaoaton ahuun anu ichapa.  
Ahuun anu rafihuunoa mato yoinon.  
Yoia cuscan acoimisi. Ascan ahuun  
anu futsan Icomisi. Nanton iconcoin  
yora chacafa onaintimai. Nan Diosin  
tsain nicacasmamisifo ato potashquin  
omitsiscapanacafo muran. <sup>12</sup> Ahuun furo  
chi uruai cuscara rafu. Chi uruaino  
faquishfiacun yoran oinsharatatiro.  
Nanscarifiai nocon Ifoan yorafoti aton  
nomurana shinain cuscan onancoian.  
Niaifo maiti sharashtacoin ichapa maia.  
Ahuun fumananqui anu cunua. Arus  
fusti nan anu onan.

<sup>13</sup> Sahuuti chainipa sahuua. Nan  
sahuuti imiqui pocoa. Ahuun anu futsari  
Diospan Tsainran. <sup>14</sup> Ahuun yorafo nai  
ariashu caballo oshopa camaqui aton  
Ifo cachiori focani. Ahuun ranushumua  
cuscarafo. Aton sahuutifo yufan oshopa  
sahuuaf. Na sahuuti oshopa rama  
patsamua cuscarafo. <sup>15</sup> Ahuun tsain  
nopu cunocoin cuscara. Ahuun  
tsainmansi manifoti yoitimamisifo ato  
onaintimai. Manifoti ato iquina  
ratofomain yoitimamisiqui ato  
curushcai onaintimaquin finacoin.  
Ahuun tsain nicacasmamisifocun nan  
Diosin ahuamamishti huatiro fasi atoqui  
sinacoin. Ascan Jesushunshon ato  
onaintimai omitsiscapanacafo muran

ato potashquin. <sup>16</sup>Jesús ahuun anu futsan ahuun sahuuti chainipa mananquirinoa yafi maiquirinoahuun cunua isca huua,

NIAIFOFO MANIFOTI ATON

NIAIFOCOIN ANUFAIN IFOAFO

MANIFOTITON ATON IFOCOINRAN ishon cunua.

**Jesús nan yoina pofu cuscara finoncoinyaino chii urumanhuan muran potani**

<sup>17-18</sup>Ascantari un oian Diosin oinmati afu nai muran ica futsan fari tsacaino nishon oi ashcafchin puiyafu noyaiton cuna, —Fucahuun. Upan Diosin mato pimapai. Niaifocoinfo non ranushumua aton niaifocoinfo non aton niaifo patasharifo non nocofunufo mutsisipaco non caballofo non caballo catu camaqui tsaoafo non nantifi Diosin tsain nicacasmamisifoti niaifofo non yora ahuamari nantifi Diosin ato namashquin. Ascacufin puiyafuan aton nami pi mayanshquincaniran, —ishon nan oinmatinin puiyafu yoia.

<sup>19</sup>Ascatan un afanan nocon Ifo Jesús ahuun noicasmamisifo nan yoina pofu cuscara yafi manifoti aton niaifofo uhuun namapan ointsa un ato oian. Man ichananfoan Jesús ahuun caballo camaqui tsaocun ahuun yorafoya rutupaican. <sup>20</sup>Aton rututamarocon Jesús ato achia chi muran ato potashquin. Nan yoina pofu cuscara yafi nan fuparamitsamiton, —Unfin Diosin tsain mato yoimisiquin, —ishon yoifashu chanimisi. Nanton yoina pofu cuscarahuunoa tsoan atiroma cuscan Satanashuunshon huamisi. Ascan nantifi cunua yorafu nan yoina pofu cuscara ahuun anu atoqui nua. Nanfoan yoimisi isca huaquin, —Min uhuun dios. Un mia noiran, —ishon yoimisifo. Ascarafofin nan yoina pofu cuscaraqui. Ascan nan

paramitsamiton tsoan atiroma cuscan ahuamamishti acai cuscan man oianfo. Ascaquin ato paracoian. Nan rafu nan yoina pofu cuscara yafi nan paramitsamisi niyoa Jesús ato chi urumanhuan muran pota.

<sup>21</sup>Nan rafutan yora tushuafo Jesús ahuun caballo camaqui tsaoashon ahuun tsainman nopus cunocoin cuscarahuunshon ato rutumana nai futsuafo. Naafanno puiyafu atoqui ichanancashon aton caya piqui mayafo.

**Jesús Satanás achishon nusha mil fari**

**20** <sup>1</sup>Ascatan Diospan oinmati Diosin icariashu fotoaiton un oian. Shafi cuscara tsoma. Nan yoshin chacafu quininhuan faquish muran icafoqui atoqui fupotu fupoa. Nanno Diosin oinmati fupotu ahuun shafi cuscara yafi cuno pono uhuapa cuscara tsoma. <sup>2</sup>Tsomashon nan famanhuan cuscara achia. Diosin mai oni huataima nan rononhuan iyopaoni.

Paramitsamisicoin. Naanfin yoshin chacacoin Satanás. Achishon cuno pononun nusha. <sup>3</sup>Ascashon quininhuan faquish muran pota. Potatan aqui fupocoian amuran mil fari inon afanan caifoti paranonma. Nan mil fari anaitiano cainmayoi ahuutishotama afanan mai ano cahuancacayon.

<sup>4</sup>Ascatan niaifoan tsaotifo Upa Diosin icanoa un oian. Jesús ahuun yorafu nan tsaotifo camaqui tsaoafo. Jesús yonoano a futan futsafo yonoshquin. Ascashon nannori un oian nan Jesús icoinal huua futsafo. Nanfo niyoano nan yoina pofu cuscara yafi ahuuna ointsa rami huati nanfoan ifoanmisima. —Minfin uhuun Ifo. Un mia noiran, —ishoncayi yoimisifoma. Aton anu aton mucu iyamarai aton fumananqui cunumisifoma. Ascatamarocon yoimisifo isca huaquin, —Jesús fustifin nocon

Ifoquin, —huamisifo. Diospan tsain fustisi tanamisifo. Ascan nan yoina pofu cuscara atoqui sinaquin ato tushtumana. Nai futsufiafo Diosin ato funimani. Punishon Jesús futan mai ano mil fari yorafoti iquina.

<sup>5</sup>Nanfo funi yoi. Ascan nan mil fari anaitiano futsanfori funimashquin. <sup>6</sup>Shinancapon uhuun yoramishtichin un mato yoiai cuscan. Nocorifi Upa Diosin noco funimaqui tau huashquin. Nocon catoan ahuun yorafo non inon. Upa Diosin yafi Criston noco yonomapaiyai cuscan non futsafuhunoa non Upa Dios cufimisi. Non Jesushuunoashu omitsiscfiamisishaquin naashu non omitsiscapanacafo muran canacama. Ascatamarocon non Cristo icanoshon a futan futsafo iquishquin. Ascashu Jesús cuscara shara icashu non fasi unimacoinskquin.

<sup>7-8</sup>Ascatan nan mil fari anaitiano Satanás quinhuan faquish murannoia afanan cainmayoshquin nan manifoti anoaflo parayonon. Ascatan Dios nicacasmafo manifoti ano ato ichanan huai Diospan yorafo rutumashquin. Ichananfoanno fasi ichaparasi. Nan Dios nicacasmafo tsoan tanan huatiroma. Aton anuquin Gog yafi Magog man huamisifo. <sup>9</sup>Manifoti cunua ato ichanan huashquin Diospan yorafo icano ato cufuacufoanifo ato rutushquin. Ascafiacon Upa Diosin ahuun yorafo fasi noiquin ato numashqui. Nan yorafo Satanás ichanan huaa nai muranshon ato camaqui chi urumanhuan potai nai futsunonfo.

<sup>10</sup>Ascatan nan yoshin chaca Satanás nanton yorafo fuparapaimitsamisicoin Upa Diosin chi urumanhuan muran pota. Nanno omitsiscapanaca. Nannori nan yoina pofu cuscara yafi a futan yonopaoni, —Unfin mato Dioshuunoa yoimisiquin, —ishon yoifiamisishaquin Satanashuunoa ato yoimisi. Fasi

paramitsamisicoin. Nan rafu non fusti chi urumanhuan muran omitsiscapashquin. Isin muuquin unupacunacafoma.

### Jesús icoira huafoma ato onaintimashquiai cuscan

<sup>11</sup>Ascatan tsaoti oshopa uhuapacoin un oian. Nanno Upa Diosin tsaaoan. Ahuunoashu nantifi mai anoaflo non nai murannoari cuyoi futsui. Ascashu nantifi yorafo nai futsui. Diosiqui onupaifiai tsoan onutiroma. <sup>12</sup>Ascatan un oian nan niaifo non yora ahuumafori naacanashu Upa Diosin tsaoan ano niafo. Nanno niafoanno Upa Diosin ahuun librofo fupua. Libro futsari fupua. Nan libro ahuun anu nipamisifo aton anu cunua. Nan nafoan amisi cuscan librofo muran nantifi Upa Diosin man cunua. Ascan nan chaca huapaonifo cunupacua cuscan ato ismashon iconcoincun ato onaintimacoinskquiran ishon ismatiro.

<sup>13</sup>Nan asafo yafi mai anoashu naamisifo nan omitsiscapanacafo muranri nantifi nan naamisifo Upa Diosin ahuun ointaifi fuaflo. Nan chaca huaflo cuscan atoti Upa Diosin onaintimapacua. <sup>14</sup>Nantifain nan Diosin tsain nicacasmamisifo Upa Diosin ato chi urumanhuan muran pota. Man naafiaoan natian ato chi urumanhuan muran pota. Nannoashu omitsiscapanacaforan ishon ato anupacua. <sup>15</sup>Ascan nan libro ahuun anu nipamisi. Tsoa ahuun anu nan libro muran Upa Diosin cunumisima nanfo chi urumanhuan muran pota.

### Nai yafi mai funacoin Upa Dios afanan oni huashquin

**21** <sup>1</sup>Ascan uhuun namapan ointsa Upa Dios noco ashoin cuscan ua oinmana. Un oian nai yafi nai

murannoafoti maifoti funacoin Diosin onihua. Nan nai yafi mai tauhuaquin onihuani yamariscatana. Nan ununhuani yamariscatana. <sup>2</sup>Ascan un oianri Diospan yorafoan Jesús tanasharamisifo nai murannoaflo Upa Dios icariashu fotocani. Nanfo icano ahuun anu Jerusalén funa. Nan Jerusalén funaya fotoashu nanno icani. Fotoaiton un oian fasi sharashtacoin. Ainfon ahuun saya sharashtacoin sahuua itisharashquin funu fu fianain. Nanscarifi aquin Upa Dios nan Jerusalén funa atishara huaa sharashtacoin inon. Ahuun yorafo nanno afu nipasharashcani.

<sup>3</sup>Ascan Upa Dios tsoa ano oi ashcafinitin un nica. Yoia isca huaquin, —iAicho! Natian Upa Dios yorafo fu iishquin. Ato muran iishquin nanfo ahuun yorafo inon. Aafin aton Diosiri iishquin. <sup>4</sup>Ato cushusharashquin afanan tsoa omitsiscatiroma. Atohuun ramapai tsoa uaicai ato shinamasharatiro aton fuon turuashontiro afanan shinanchacai cuscan pusitama unimanon. Ato cushuaino tsoashta afanan nayamacain manoyamacain uaiyamacain isin mucanimaran, —ishon yoia. Ahuara chacafo iyopaoni cuscacai afanan ascanacama.

<sup>5</sup>Asca huatan Diosin ahuun tsaoti camaqui tsaoshon yoiquin isca huaa, —Un nantifi funa onihuairan, —ishon Dios yoia. Ascashon futsan ua yoia, —Min nicai cuscan cunuhuu nan tsain nantififain icoindra huanonfo. Icoindra nan tsain yorafoan icoindra huatirofo, —ishon ua yoia.

<sup>6</sup>Ascashon afanan Diosin ua yoia isca huaquin, —Mun aca. Natian mun yoionyi cuscan man anaitia. Ahuara oni huataima un iyopaoni. Ahuutiamain maifoti cuyoicai urus fusti un yoitiro. Un nantifi iquina. Ufin ipamisiquin.

Tsoan naaqui nomicoinquin yoitiro isca huaquin, “Unfin fasi unu yopacoincái nashquima,” ishon yoitiro. Nanscarifiai tsoa ipasharapaiquin yoitiro isca huaquin, “Un fasi numamisi yopai. Un Dios yopacoinran,” ishon anori yoaition un unimaquin cashmancoin nan nimapacutiro ufu nipanon. <sup>7</sup>Tsoan ua cachiquiri huatamarocon nan naitian ua tanasharacun nantonacaijin nantifi un mia yoia cuscan ahuunari iishquiquin. Naanfin un cashman inanshquin. Unfin ahuun Dios iishquin. Aafin uhuun facu iishquin.

<sup>8</sup>Ascan ratoran futsan ratutan cohuuqui uhuunoashu omitsiscapayamacun ua cachiquiri huashquin uhuun tsain icoindra huayamafain chacacoin futsa futsatapafo shatucasmafain rutumitsamisi icain aton ahuinma chotamisi icain ainfofoanri aton funumafo chotamamisi icain shointi nan yoshin chacafo fu tsainmisi icain Uacai noitamarocon ahuara futsan finaquin noicoiajin icain ascarafo yafi nantifi chanimisifori ufu ipatamarocon chi urumanhuan muran nan omitsispacunacafo muran ipashcani. Anoashucui fonacafoma, —ishon Upa Dios ua yoia.

### Jerusalén Funa

<sup>9</sup>Ascatain Diosin oinmati afu nai muran icafo nan siete nanfoan tutso muran ahuara chacacoin fospihuamua maifoti camaqui ocacaquin ato omitsiscamacani futsan uqui oshon ua yoiquin isca huai, —Ohuu. Un mia ahuara sharacoin ismai. Nocofunun ainfo fii cushusharashquin. Nanscarifi aquin Jesús nan chashoanun facu cahuanshara cuscaraton icoindra huafia ahuun yorafo inon. Ohuu. Un ato mia ismanon, —ua huaa.

<sup>10-11</sup>Ascan Diospan Yoshin Sharapan ua iquinaiton Diospan nai oinmati ua machi uhuapa cuyacoin camaqui iyoa nantifi un oinnon. Jesús icoirra huafio nan Dios icanoafo aton chaca soashona nanfo nai murannoia Upa Dios icariashu fotoaifoan ua isma. Nan machi cuyacoin anoshon ua isma. Nanfo icano ahun anu Jerusalén funa. A muran icafo Jesús tanasharamisifo. Upa Diosiri atofu ica. Nanno fasi faca facaitsa. Toquiri faca facaitsa cuscara. Fasi sharashtacoin. Nan toquiri ahun anu jaspe tsosia shara toquiri futsan ahun anu cristal. Faca facaitsa cuscara.

<sup>12</sup>Cunu cushto mutsisipan cuyacoin nan Jerusalén tarati huayacuna. Nan cunu cuyacoin doce fupotiya. Fupotiti ano Diospan oinmati afu nai muran icafo doce nia cushusharashquin. Israeli ahun facu doce facufo aton funafori tiri futsan pashcanifo. Nan fupotifoti aton anu doce nutanfo.

<sup>13</sup>Nan cunu rafu non rafuri cuyacoin iyacuna cuscan fupotiya doce fari oaiquiri rafu non fusti non fari oai istafari rafu non fusti non fari cai istafari rafu non fusti non fari caiquiriri rafu non fusti fupotiya.

<sup>14</sup>Nan cunufo cuyacoin toquirininhuan doce camaqui onihua. Jesús nan cashoanun facu cahua sharashta cuscara afu rafumisifo doce aton anu toquirininhuantiqui nutan.

<sup>15</sup>Diospan nai oinmati futsan nan unfu tsainquin tananti tsoma Jerusalén funa non ahun cunufo cuyacoin uhuapan non ahun fupotiri tananshquin. Nan tananti facatahua chainipa cuscaraifiashu oro sharashtacoin. <sup>16</sup>Nan Jerusalén funa ahun cunu rafu non rafuri cuyacoin nantishon fosi. Ahuun chainipa non ahun ashfanri nantishon rafu. Ahuun cuyari nantio fosi. Diospan nai oinmati futsan tanan dos mil dos

cientos kilometros ahun chainipa non ahun ashfan non ahun cuyari.

<sup>17</sup>Ahuun cunufo cuyacoin ahun cushto sesenta y cinco metros tanan. Nan oinmatinin afu nai muran icaton yorafoan tananmisi cuscari arifi metronun tanan.

<sup>18-20</sup>Jerusalén funa sharashtacoin.

Ahuarafo amuran vidrio botica cuscara cushtocoin ocu rafu oinquín non nocotiro. Vidrio botica cuscaraifiashu oro. Nanhuunoa Upa Dios onihua. Ahuun cunufo cuyacoin non cushtocoinri. Toquiri ahun anu jaspe tonan shara ahun cuno oshin shara faca facaituya osian. Toquiri sapa cushtocoin futsa futsatapafo doce putsamuinia camaqui nan cunu rafu non rafuri Upa Dios onihua. Toquiri sapa fasi chainipa cushtocoin futsa futsatapafo fusti tauhuaqui fuca. Ahuun anu jaspe.

Nan jaspe tonan shara ahun cuno oshin faca facaituya osian.

A fuchi toquiri sapa futsa fasi chainipa cushtocoin ahun anu zafiro. Nan zafiro tonan sharashtacoin.

A fuchi toquiri sapa futsa fasi chainipa cushtocoin ahun anu agata. Nan agata shonan sharashtacoin osian.

A fuchi toquiri sapa futsan chainipa cushtocoin ahun anu esmeralda shonan sharashtacoin.

A fuchi toquiri sapa futsa chainipa cushtocoin ahun anu onice oshin mapash sharashtacoin.

A fuchi toquiri sapa futsa chainipa cushtocoin ahun anu cornalina oshin sharashtacoin.

A fuchi toquiri sapa futsan chainipa cushtocoin ahun anu crisolito ahun cuno oshin faca facaitsa cuscara sharashtacoin.

A fuchi toquiri sapa futsan chainipa  
cushtocoin ahuun anu berilo  
shonan mapash sharashtacoin.  
A fuchi toquiri sapa futsan chainipa  
cushtocoin ahuun anu topacio  
chashna sharashtacoin.  
A fuchi toquiri sapa futsan chainipa  
cushtocoin ahuun anu  
crisoprasa shonan yafi chashna  
mapash osian sharashtacoin.  
A fuchi toquiri sapa futsan chainipa  
cushtocoin ahuun anu jacinto  
nanhuain ointsa mapash  
sharashtacoin.  
A fuchi ahuun unutaquin toquiri  
sapa futsan chainipa  
cushtocoin ahuun anu amatista  
nanhuain ointsa sharashtacoin.  
Nan toquiri sapa doce  
sharashtacoin a fuchi cunu Upa  
Diosin nimainifoanni.

<sup>21</sup>Nan cunu rafu non rafuri ahuun  
fupotifo doce perlahuunshon Diosin ato  
onihua. Perla toquiri cuscara osho  
sharashtacoin. Nan perla fustihuunnoa  
fupoti fusti onihua. Perla fustihuunnoa  
fupoti fustiri onihua. Nansca huashosi  
nan doce fupotifo Upa Dios onihua. Nan  
Jerusalén funa ahuun faitifi oro  
sharashtacoin onihua. Nan oro vidrio  
botica cuscara cushtocoin ocu rafu  
oinquin non nocotiro.

<sup>22</sup>Ascan nanno Dios fu tsainti pushu  
yamai. Upa Dios nan ahuamamishti  
huatiro yafi nocon Ifo Jesús nan  
chashoan facu cahuan sharashta cuscara  
Jerusalén funa muran imisifo. Ascacufin  
yorafo atofu tsainpai pushu  
yopacanima. <sup>23</sup>Nanscarifiai nanno fari  
yafi oshu yopacanima. Upan Dios yafi  
Jesús nan chashoan facu cahuan  
sharashta cuscara atofu ica. Upan Dios  
nanno ishon ato chashashona. Jesusrifi  
aton lamparina cuscara ato otashona  
cayacafi oinsharanonfo. <sup>24</sup>Nanhuanshon

chashaino manifoti nifoanfafaitirofo.  
Niaifoanri nan Jerusalén funa muran  
iquishon ahuarao shara man aya  
cuscan iquimashquin.

<sup>25</sup>Nanno yamuri yamai.

Faquishpacunacama. Ascan ahuun  
fupotifo fupopacunacama. <sup>26</sup>Ascan  
Jerusalén funa muran manifoti anoaflo  
iquicaquin ahuarao shara aya cuscan  
amuranri iquimashcani. Aquí fasi  
unimacani finacoinshecani. <sup>27</sup>Ascan  
ahuarashta chaca amuran iquitiroma.  
Nan shinanchacamisifo non chaca  
huamisifo non paramisifori  
iquitirofoma. Tsoa Jesús nan chashoan  
facu cahuan sharashta cuscara ahuun  
libro muran ahuun anu cunuano nanno  
afu ipatiro. Nanfosi Jerusalén funa  
muran iquitirofo Jesús fu  
ipasharashcaquin.

**22** <sup>1-2</sup>Ascan uhuun namapan ointsa  
Diosin ahuun oinmati afu ica  
futsan Dios icanomain ahuu cuscaraquin  
ua isma. Upa Dios yafi Jesús nan  
chashoan facu cahuan sharashta cuscara  
tsaoa anoashu unu tsosi cristal  
shafacaficoin ointsa afain. Icafo  
nushmancayan unu afain. Nanno  
icafoan nan unu tsosi shara  
ayapaiyaitian ayatiro. Nannoashu  
nipanaca. Nannori fai nushmancayan  
ica. Unu ocama rafu nii shocoa. Nan nii  
ahuun fimi piipaityaitian pitiro.  
Nanscarifiai Dios no fu ipacoainno non  
ahuunoashu nipasharashquin. Nan nii  
oshutifi fimidisi. Ahuun pui  
tsasipacunacama ahuun shachoco funa  
shara ipanaca. Ahuunoashu manifoti  
non Dioshuunoashu muma funa shara  
ipanaca.

<sup>3</sup>Nanno Jerusalén funa Upa Diosin yafi  
Jesús no fu iishquin. Non aton  
yoracoinshecani non ato noicoinshecani.  
Non aton oinmati cuscara iishquin. Ato  
fanainsharashocun ato yoisharapacunaca.

Ascan nocon mai shuni ano chaca futsa futsatapafo ipaoni cuscacai nan Jerusalén funa ascarama. Ahuashta chaca amuran itiroma.<sup>4</sup> Nannoia nocon Ifoan fuso oinfafaincani. Aton fumananqui ahuun anu nutamana.<sup>5</sup> Nocon Ifon Diosin ari icafo ato shafahuashoan. Ascan afanancai lamparina yafi fari yopatirofoma. Anocai afanan yamuima. Nanscashu afu niaifo patashari ipanacafao.

### Jesús oti chaima

<sup>6</sup> Ascatan Diospan oinmati afu nai muran icaton afanan ua yoia, —Nocon Ifon Diosin ahuun tsain yoimisifo aton nomuran tapimamisi ahuara ahuuscaranai cuscan aton yorafo tapimashcanni. Nanscarifiai natianri ahuun oinmati afu ica futsa nichian ahuara ahuuscaran arishcashquiain cuscan ahuun icoindra huafoti tapimashquin. Nan un mia yoiái cuscan iconcoin. Nantifi uhuun tsain man icoindra huatiroran, —ishon ua yoia.

<sup>7</sup> Yoiquin asca huatan nocon Ifo Jesús yoia isca huaquin, —Un nai murannoashu mai ano matoqui nocoriscashquin. Man min oian inon pacuai cuscan nanfo min cunushotiro. Tsoan nanfo icoindra huafain cachiquiri huayamashu unimacoin iishquiran, —ishon Jesús ua yoia.<sup>8</sup> Uquian, Juan, un nanfo nicafain oian un nan Diospan oinmati afu nai muran icaton un anaman nofuomupacua nan uhuun ifocoincun ismashquin.<sup>9</sup> Un asca huafaiton ua yoia isca huaquin, —Asca huayamahuu. Urifi mia cuscara. Min non Jesús icoindra huafio non ahuun tsain yoimisifo non nantifi nan min rama cunua cuscan icoindra huafio urifi mato cuscara nocon Ifon Diosin ahuun oinmati. Ascan Upa Diosin fustisi min Ifo huatiro. Nan fusti min anaman nofuomupacucahuashotiro, —ua huaa.

<sup>10</sup> Ascatan afanan ua yoia isca huaquin, —Ahuuscaran arishcashquiain cuscan min rama cunua samamashta iishquin. Ascan min cunua cuscan onuyamahuu. Nantifi yorafo tapimahuun.<sup>11</sup> Ascan Jesús nococaitian nan nicacasmamisifo fasi chaca finacoinsquicani. Yora chacacoin huamisifori mimacoin chacacoin iishquin. Nan Diosin yoia cuscan huamisifori mimacoin Diosin yoia cuscan aashcani. Nan Jesús cuscara shara imisifoanri mimacoin huaquin aton Ifo tanasharashcanni, —ishon Diospan oinmatinin nan afu imisifo futsan ua yoia.

<sup>12</sup> Ascashon Jesús afanan yoia isca huaquin, —Ua nicasharacahuun. Un matoqui samamashta nocorisca. Nocoshon un mato yoia cuscan man huacun un mato inansharashquin. Nan shara huamisifo un ato shara huafain nan chaca huamisifo un ato onaintimacoinsquicani.<sup>13</sup> Ahuarafu onihuataima un iyopaoni. Unfin ipamisiquin. Un ipashquin. Un unupacunacama. Ahuutiamain maton mai cuyoicai urus fustifin un yoitiro.

<sup>14</sup> Jerusalén funa muran iquishon nan nii ahuun fimi pipaiquin pitiro nipashquin. Nanscarifiai Upa Dios fu icaino arus fusti mato nimapacutiro. Nan ua icoindra huafio aton chaca soashona nanfo fusti uhuun Upa Diosin ato iquimatironofu ipanonfo.<sup>15</sup> Ascan nan yora chacacoin pashna pofu cuscara iquimayamafain shointifo ya nan shointi icoindra huafio iquimayamafain nocofunun ahuun ahuinma chotamisi yafi ainfoanri ahuun funuma chotamamisi iquimayamafain rutumitsamisi iquimayamafain tsoan Dioscoinma noiquin ifoancun iquimayamafain nan chanimisifo nan chani noimisicai. Ascara yorafocai Jerusalén funa muran iquitirofoma.

<sup>16</sup>Unquian, Jesús, uhuun oinmati nan unfu icaton miqui nichian un mia yoia cuscan ua icoindr huafo ichananti anori min ato tapimanon. Unquian David ahuun funa. Un fishi uhuapa shafainoshta oinmisi cuscara. Nan fishi oinquin non tapitiro samamashta shafariscatiro. Nanscarifai un otichaima tapicanashu itisharatirofo Jerusalén funa muran ufu ipanacaforan, —ishon Jesús yoia.

<sup>17</sup>Ascano Diospan Yoshin Shara yafi Jesús ahuun yorafoanri nantifi yorafoqui isca huacani, —Jesusqui fucahuun, —yoiafoan. Tsoan nicacoiaintón yoiqui isca huatiro, —Jesusqui fucahuun, —huatiro. Tsoa nomicoin unu yopai unu ano catiro ayatan ahuun nomi shatutiro. Nanscarifai tsoan ahuun chaca shatupai Jesusqui otiro Upan Dios fu ipashquin. Ahuara inantamarocon Jesús icoindr huashu afu nipatiro.

<sup>18</sup>Unquian, Juan, ahuuscaran arishcashquiain cuscan un mato cunushona. Un mato cunushonai cuscan cayacaficoin. Tsoan nan tsain

nica natian un mato yoipacuai cuscan. Ua nicasharacahuun. Un mato cunushona cuscan tsoan afanan tsain futsa shinanfain cunucun nan libro muran omitsiscapanacafihuunoa cunua cuscan iconcoin Upa Diosin nantifi nanfo omitsiscamashquin.

<sup>19</sup>Ascantari ahuuscaran arishcashquiain cuscan un cunua tsoan nan tsain atirifi soacun Upa Diosinri ahuun anu soashquin nan ahuun libro muranno. Ascacufin nan Jerusalén funa shara muran iquipacunonfoma. Un nan cunua cuscan nan Upan Diosin ahuarashta shara yoiyoní cuscan aya ipanaca.

<sup>20</sup>Jesús yoia cuscan nannori un mato cunushona. Nanton yoiqui isca huua, —Icon. Un matoqui samamashta nocoriscairan, —ishon yoia. Ascaran inon. Ifon Jesús nocoqui oriscahuu.

<sup>21</sup>Mancaí Diospan yorafo. Ahuara ahuuscarafiaino nocon Ifon Jesús matohuun noishon maton nomuran mato fupuashoin man shara inon. Nancasi ipanon. Amen. Nanti.

*Juan*